

ESUSËN UAN ISMIAID

Nëidba chuiquin Uanën dada uaid

¹ Nuquin Papan tantiamiac Esuquidistun ismeboedquio chuibanquin dada uaic nebi. Esusbëd ictenedquio aton yuambo Uan nebi. —“Nuquin Papa aton Mado Esusbëdi abitedishun Icho icquin Satanas chedo ambi yuaido matsesbëdta cuidquimbi Esus tantiaquido abëdi tabadmendac,” quequin ma nuqui tantiaquidon tantianu — quequin Nuquin Papan chiac Esuquidistun ismeposhi. Esusën namiac abi yacnoshon uaid mayan bëdabontsen ismeposhi.

² Adoac Nuquin Papan chiaidbëdta Esuquidistun ismeboedquio chuibanquin dada uaic nebi. Abimbo caimbique. Tantia.

³ Nëid dada uaid tantiash chuibanquido ambi chiaidobëdi: —Ambi chiacpadomboen nëbi Esusën nanushe. Chieshtoenquio icquin abi tantiec bëdamboec tabadnuna —quiash bëdamboec tabadsho Nuquin Papan bëdambo icmendac.

Esus tantiaquidon iste dada uaid

⁴ Nidaid utsi Asia caid yacno tabadquidon Esus tantiaquidon mimbi iste dada uaic nebi. Sietetedi shubu dadpen icquid yacno-yacnomboec tabadquido Esus tantiaquido mibi chuiquin dada uaic nebi. —Ambi nacpadomboen Nuquin Papan aton Mado Esusbëdtan bëdamboen isquin bëdambo icmepashun. Adembidi aton Mayanën bëdambo icmepashun —quequin mibi tantiembi. Nidaid

uabi yec ëndenquimboshë icpampidi nëbi adquid yec nibëdantiapimbo icquid Nuquin Papambo nec. Aton Mayanën abi bëisec tabadquidëmbi nuquibëdtsen icquin Nuquin Papan chiaid nuqui tantiamec.

⁵ Aton Mado Esuquidistu Nuquin Papan bëdamboen iste tantiamequidquio nec. Abia aton dada unëstiapimbo icquid icmequin uincuemiaidquio nec. Adquid yec abitedishun Icbombo nec. Ambiuidtsëqui chuiquid dapa abitedimbo namendac. Aidquio nuqui tantiaquidquio yec nuqui icsaid bedshunuec abided ciudadec unëspondash.

⁶ Abi tantiasho Esusën aton Papan yuabo nuqui icmec. Aden Nuquin Papan chiacpadomboen naquin: —Con matses bëdamboen ista —quequin Nuquin Papa chianequidquio nuqui nec. Adquido icquin: —Esus bëdamboshë iquec. Abitedishun Icbombo nec. Ambi chiacpadomboen abitedishun napashun —canuna ënenquio icquin.

⁷ Aidquio tantianuna. Nëbi chonoshe. Abitedishun Icbombo yec dacuëdampamboec chosho matses abitedishunquio isendac. Con matses ambi unës uaondaidquio chosho istanec: —Padtemboshë. Ashibi cuidpec —quetanec cuidte tantiec dacuëdec natiaic shubiendac. Esus tantiesabo utsibotsen adecbidi abi cuidte tantiec natiaic shubiendac.

⁸ Adnubien Nuquin Papan chioshi. —Ëmbi tantiacmaid nibëdec. Abitedi comapenen tantiaquidquio nebi. Nidaid uabi yec ictenedi nebi. Nëbi adquid yec nibëdantiapimbo icquidquio nebi. Adquid yec abitedishun Icbombo nebi —queposh

Nuquin Papa. Aidquio tantianuna.

Dacuëdampamboecnuc Esusën ismiaid

⁹ Esusbëd ictened Uan nebi. Mibëdtan Esus tantiaquid yec min utsibimboecquid nebi. Mibi yacpadembidi Esus tantiasho Esus tantiesabon chieshëmpondashi. Adoac Esusën namiacpadec chieshtoenquio iquebi. Chieshtoesa yec Nuquin Papabëd tabadtequido nuqui nec. Esus tantiesabon chieshënquin quënën nauedacbimboen cuemenquio icnuen acte dapa nuacquid mad caid nënantan nidaid icquid Pacmos caidën tsadumpondashi. Adondac Pacmos caidën abi tsadec nebi.

¹⁰ Dominco ushën Esus tantiec tsadshobini Nuquin Papan Mayanën tantiameposh. Adoac cachocuësh shoncate shoncacbimboec comapenec onquesho tantiapombi. Ushenquio icquimbi ushquin isacbimboen tantiombi.

¹¹ Naden chuiposhi. —Nëbi mibi dadpen ismenu. Adoac ëmbi ismeboedtedi dada uabanta. Nëidtedishun iste dada uata. Nëidic shubu dadpen icquid Epeso caid yacnocquidon. Nëidic shubu dadpen icquid Esmidina caid yacnocquidon. Nëidic shubu dadpen icquid Pedcamo caid yacnocquidon. Nëidic shubu dadpen icquid Tiatida caid yacnocquidon. Nëidic shubu dadpen icquid Sadis caid yacnocquidon. Nëidic shubu dadpen icquid Pidadepia caid yacnocquidon. Nëidic shubu dadpen icquid Daudiseya caid yacnocquidon. Aïdtedishun iste dada uashun buame —quequin comapenec onquequin chuiposhi.

¹² Comapenec onquesho tantiatanec bidiaquin isquien tabote manitsinaid 7tedi icposh. Shocosh piu nacnenaidquio neposh.

¹³ Aid nënantanquio Esusquio icposh. Con matses isadaidbo chuiquid dapabimboec dasiuidaccosh. Dashcute ënapen icquid abitiombi datonquiac-cosh. Abi shictonquete bëshpiu-bëshpiuctsëcquid nuacquid dapambo icposh.

¹⁴ —Icsaisambo nec —camenuc aton mapi aton manëdaidbëdi abu ushubimboec ushumboshë icposh. —Matsesën naidtedi tantiaquidquio nec —camenuc cuëte isquidbimboec aton ëshë isquid-isquidquio icposh.

¹⁵ —Utsin: “Ëmbiquen abitedi namenu,” catiapimbo icnuc abitedimbo namequid nec —camenuc shocosh piu nacnenaidbimboec nac-nacquio aton taë icposh. —Nuquin Papapadquidquio nec —camenuc acte chododoquiabimboec comapenec onqueposh.

¹⁶ Abiucshun uispa 7tedi sanamposh. Chështe cuënumbo icquid ana shëcuënuësh cueshqueposh. —Matses icsaid cuidquidquio nec —camenuc adposh. Aton bëtantete ushëbimboec bëchamauanquiecposh. —Bëdambo icquidquio nec —camenuc ad icposh.

¹⁷ Dacuëdampamboecsho istanequini Esusën dayumbi uebudpaccoc unësaniacbimboec padishec. Adshobini Esusën camishquin bëdameposh. —Dacuëdenda. Nuquin Papapadquidquio nebi. Nidaid uabi yec ictenedi nëbi adquid yec nibëdantiapimbo icquidquio nebi. Adquid yec abitedishun Icbombo nebi.

¹⁸ Adquid yequi matsesën unës uaid

yec uincuenash padpidec unëstiapimbo icquid nebi. Adquid icquin ëbi tantiaquido unësacsho uincuemeshun Con Pa yacno ëbëdi tabadmendambi. Ëbi tantiesaboembi icsaido cuidacno nidmendac –queposh Esus.

¹⁹ Adashic abi onquec: –Naden chuiquin dada uata. “Nëbi nadquid iquec. Nadquid utsi iquendac. Utsin nadotsiandac,” quequin ëmbi chui-boedbëdta ëmbi ismeboedtsen chuiquin dada uabanta.

²⁰ Tantia. Ëmbi uispa 7tedi icquid abiucshun sanamboed mibi chuinu. “Nidaid Asia caid yacno 7ted shubu dadpen icquid yacno-yacnomboec ëbi tantiec iccuededquido chuibanquido 7tedbidi icoaic,” quequin tantiaquin uispa 7tedi ismec nebi. “Ëmbi namiaido nec,” quequin uispa sananquin ismec nebi. “Ëbi chuibanquidën chuiban-sho tantiec iccuededquidobëd iquebi,” quequin tantiaquin tabote manitsinaid 7tedi tabëcacno aid nënantanquio ëbibi iquebi –quequin aden ismeposhi Esusën.

2

Epeso yacnocquido Esusën chiaid

¹ Aden Esusën uispa 7tedi sananquin ismioshi. Tabote 7tedbidi manitsinaid tabëcacno aid nënantanquio abibi icquin ismioshi. –Ëbi tantiaquido chuibanquidën Icho yec ëbi tantiaquidobëd iquebi –quequin aden ismeposhi. Adshumbic naden chuiposhi. –Epeso yacnocquidon ëbi tantiaquidon iste ëmbi naden

chuiboed dada uata. “Tantia, Epeso yacnocquido. Mibitedi chuinu.

² Mimbi naidtedi tantiaquid nebi. Dayacquio icquin ëmbi chiacpadomboen mimbi dadpen nabanoc. Utsibo chieshtonobi chieshtoenquo icquin mimbi ëbi tantioc. Ëbi tantiaquido icsamenuen chiec: ‘Esusèn namiaidquio yec mibi chuinuec chopobi,’ quequin muaquidon chuisho: ‘Mua. Nuquin Papan chiaidpenquo mimbi chuibanoque. Utsibo chienda,’ quequin mimbi aidon chiaid tantienquo iccoc. Aden mimbi bëdamboen naoc.

³ Adembidi utsibon chieshënaqui chieshtoenquo icquin Nuquin Papan chiaidbëdta ëmbi naid mimbi chuibanoc.

⁴ Aden bëdamboen nasho isun mibi icsaid abentsëc chuitsëcnu. Tauamboen mimbi ëbi tantiaquiopadenec. Aden ëbi tantiaquidquo icquin mimbi utsibotsen tantiaquiopadenec. Adodenedëmbi pacuënëdadbimboen ëbi bëdiactsëc tantiatsëcquin utsibotsen mimbi bëdiactsëcbidi tantiatsec. Adec mibi icsacuededec.

⁵ Ëmbi chuiboed tantiash: ‘Ai, abimbo caic. Tauamboen Esus tantiaquiondaidi nëbimbi bëdiactsëc tantiachitec. Adchitequini icsaoc,’ queshun tauamboen mimbi naondacpadomboen ëbi tantiaquiota. Adembidi utsibotsen tantiaquiota. Adoenquo icshoembi mibi yacnoshon ëmbi chiaid mibi chuibanquid nibëdmendac. Adnuc ëbi tantiec cuëdënuec mibi pudued-puduedenquo ictsiandac.

⁶ Mibi icsaid ënquin chiombi. Nëbi mimbi naid utsitsen isash bëdambo iccobi. Mibi cuëdënacno puduedshun nicodaitabon mibi icsamenuen ic-

samboen chuisho tantiashun: ‘Aido icsamboshë iquec,’ mimbi caoc. Adembidi aido bëdamboen istiapimbo icoaibi.

⁷ Nëbi ëbi tantiaquido utsibo chuinu. Ëmbi Epeso yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Satanasën: ‘Icsamenu,’ caqui chieshtoenquo icquin ëbi tantiasho Nuquin Papa yacno ëbëdi tabadmendambi. Tauamboen matses uashun Nuquin Papan aid dada tsadacno tied bëdamboshë yacno tied nënantan icquid cuëte matses unëstiapimbo icquid icmete icmepampic. Aid cuëte bacuë meniacbimboecnuc mibi padpidec unësenquo icnuc ëbëdi tabadmendambi,” quequin ëmbi chuiboed dada uata —quequin Esusën chuiposhi.

Esmidina yacnocquido Esusën chiaid

⁸ Adshumbic Esusën padpiden chuioaposhi. Aid nidaid uabi yec icpampidi nëbi adquid yec nibëdantiapimbo icquid nec. Adquid yec abitedishun Icbombo icshobi chieshëmënquidon unës uacsho chococaqui uincuempaccondash. Adondaaid yec unësaid uincuemquidquo nec. Aidën naden chuiposhi. —Esmidina yacnocquidon ëbi tantiaquidon iste ëmbi naden chuiboed dada uata. “Tantia, Esmidina yacnocquido. Mibitedi chuinu.

⁹ Ëbi tantiaquido icsho utsibon chieshënac mimbi dayun uaid nibëdquiendac. Nëbi mitsana nibëdquid yequi con Pa yacnuësh dadpen dayun uaquidbimboec mibi bëdamboshë iquendac. Chieshëmënquidon mibi icsamboen

chuishumboedtsen tantiembi. Mibi yacnoshon Satanasën namiac: 'Isadaidbo nebi,' quequidon mibi icsamboen chuishunosh. Nuquin Papan con matses caido yequi Nuquin Papan yuapenquoio yec Satanasën yuaboen nec.

¹⁰ Aido tantiash: 'Ashibi mëyampatsiash,' quec dacuëndenda. Satanasën: '¿Ada Esus tantiaquido chieshtoenquoio ictsiashe? Tanu,' quequin nami-acpadomboen chieshëmënquidon mibi utsi-utsien quënën nauedbanendac. Adoac daëdpactsëc ushec mibi mëyadendac. Puduenabi yec chieshtoenda. Chieshëmënquidon: 'Esus tantiaquido icsho mibi cuesunenu,' caqui chieshtoenda. Aidon cuesuni-acsho mibi Nuquin Papa yacno puduedmeshun ëbëdi tabadmendambi.

¹¹ Nëbi ëbi tantiaquido utsibotsen chuinu. Ëmbi Esmidina yacnocquido chuibocpadomboen con Mayanën mibitsen tantiametsiashe. Pabiate cuembo icquin ëmbi chiaid tantiata. Chieshtoenquoio icquin ëbi tantiasho isun icsaido cuidquiacno nësecainquoio iquendambi," quequin ëmbi chuiboed dada uata –quequin chuiposhi Esusën.

Pedcamo yacnocquido Esusën chiaid

¹² Adoshombic ana shëcuënuësh chështe cuënumboshë icquid cueshqueboedën Esusën naden chuioposhi. –Pedcamo yacnocquidon ëbi tantiaquidon iste ëmbi naden chuiboed dada uata. "Tantia, Pedcamo yacnocquido. Mibitedi chuinu.

¹³ Mibi yacno Satanasën yuabo dadpen icnuc ëbi tantiec mibi chieshtoenquoio iquec. Ënden Satanasën namiac mibi yacnoshon

chieshëmënquidon con yua Antipas caid cuesunepondash. Aidën chieshtoenquio icquin ëmbi naid chuibansho cuesuniacsho isumbic adembidi chieshtoenquio icquin mimbi ëbi tantiaquiopondac. Aden mimbi bëdamboen naid tantiembi.

14 Adonaid tantiaquin mibi icsaidtsen chuinu. Mibi cuëdëncuededacno Esus tantiaquido icsamequid utsi-utsiec puduedposh. Badan caidbimboecquido aido nec. Ëndenquimboshë matses utsibo chuiquid dapa Badac caidën: 'Isadaidbo aquec cho,' cac comapenen tantiaquidën Badan caidën isadaidbo Nuquin Papan chiaid niacmenuequin chuitampampic. Aidën chiacpadomboen Badac caidën matses chidobon isadaidbo dada dadpen chudmebededpampic. Adshumbic ambi papa caid Nuquin Papapenquio tantiamenuen ambi papa quequin dasamboed nëish pichicaid pebededacno buampampic. Aden Nuquin Papan chiaid niac-niacmec icsamianquido mibëd iquec. Aido cuemepatecnëdan mimbi.

15 Adec nicadaitabo caido ëbi tantiate shubun puduedash mibëdi cuëdëncuededec icsamiente bumpec.

16 Aidon chiaid tantienda. Ëmbi chiaid mibi niac-niacmenushe. Aidobëd tabadenda. Mibi cuëdëncuededacno chomenda. Ëmbi chuiboed niacbidansho isun con ana shëcuënuësh cueshqueboedën chështen cuesacbimboen mibi cuidtsiambique.

17 Nëbi ëbi tantiaquido utsibotsen chuinu. Ëmbi Pedcamo yacnocquido chuibocpadomboembidi

con Mayanën mibitsen tantiametsiashe. Pabiate cuembo icquin ëmbi chuibod tantiaata. Chieshtoenquo icquin ëbi tantiashe bëdambo icmendambi. Nuquin Papan isadaidbo mana caid pemedenequin dayun uacpadomboen mibi bëdamboen tabadmendambi. Adshumbic: ‘Ëmbi tantiaidquo yec ëbi yacno puduedtequid nec,’ qeshun cuënote ushu menendambi. Abi cuëmëdquid icnubi utsi uain cuënquin aid cuënoten dada uatanquin menendambi. ‘Ëmbi meneboedënuidtsëqui ma isnu,’ quequin adoendambi,” quequin ëmbi Pedcamo yacnocquido chuibod dada uata –quequin chuiposhi Esusën.

Tiatida yacnocquido Esusën chiaid

¹⁸ Adoshombic aidëmbidi padpiden chuioaposhi. Cuëte isquidbimboec aton ëshë isquid-isquidquo yequi aton taë shocosh piubimboec nac-nacpambo icposh. –Icsaisambo yec Nuquin Papan Madombo nec. Adquid yec abitedishun naid tantiaquidquo icquin matses cuidquidquo nec –camenuc adquo isadquidën naden chuiposhi. –Tiatida yacnocquidon ëbi tantiaquidon iste ëmbi naden chuibod dada uata.

¹⁹ “Tantia, Tiatida yacnocquido. Mibitedi chuinu. Mimbi naid abitedi tantiembi. Ëbi tantiaquin mimbi utsibotsen bëdamboen tantiec. ‘Aton Papabëdtan Esusën bëdamboenshë natsiashe,’ quequin chieshtoenquo icquin mimbi ëbi tantiec. Adquid icquin ëbi tantiamenuen utsibo nashunquido mibi nec. Ëbi tantiesabon: ‘Padi. Esus tantienda,’ caqui mimbi chieshtoenquo

icquin ëbi tantiapec. Tauamboen ëbi tantiaquin daëdpactsëc naondaïdi nëbi ëbi tantiaquioshon ëmbi chiacpadomboen mimbi dadpen naic.

²⁰ Adec utsi-utsiec bëdambo icnubi icsamianquid chido abi iquec. Aid mimbi cuemepatecnëdan. Aid cuemenquio yec mibitedi icsaic. Mimbi cacumiabi mibi iccuededacno isadaïdbo tsusedpan chido Esabed caïdbimboecquid chido icsamboshë icquid muanuec puduedposh. Puduedshumbic: ‘Nuquin Papan chiaïd chuiquid nebique. Tantia. Chuinu,’ quequin abi bunaiduidquio chuibanosh. Adoac ëbi bëdiactsëc tantiauidtsëcboedi aidën chiacpadec icsacuededposh. Nuquin Papapenquio utsibon papa caïd tantiabededacno puduedposh. Adshumbic aidon papa quequin dasamboed nëish pichicaïd pec tabadcuededquimbi aton chidopenquio chudbededposh.

²¹ Adsho isun aid chido: ‘Ma abi icsaid ënu,’ qeshun badedquio cuidenquio iccombi. Adobiqui abi icsaid ënte bunenquio iccosh.

²² Adec abi icsaid ëntiapimbo icsho isumbimbi nëbi cuidendac. Ëmbi nac daicsabudash mëyadquiec aton ueten uendac. Ambï chiacpadomboen naquido adembidi mëyadquionoc cuidendambi. Aidon ambi naïd ënshoembi cuidenquio icsiac.

²³ Aid chido cuidquioquimbi aton bacuëbobimboecquido aidën chiacpadomboen naquin ëntiapimbo icquido adembidi cuidquien-dambi. Ëmbi adosho isun ëbi tantiaquidtedishun: ‘Matsesën otacquio tantiaïd tantiaquidquio Esus nec. Adquid icquin abi icsaid ënenquio icquido cuidquin abi tantiaquido bëdambo icmendac,’

quequin tantiatsiash.

²⁴ Tantia. Ambocquido ëbi tantiaquidombotsen chuinu. Aden Satanasën chuimaidën chuisho: ‘Aden chuisho tantiatiapimbo iquebi,’ mimbi capoc. Aden bëdamboen nasho isun utsi chienquio iquemi.

²⁵ Nëiduidtsëqui chuinu. Mimbi bëdamboen nabocpadomboen chieshtoenquio icquin ëbi tantiata. Ëbi choabi yacpadembi adota.

²⁶ Choshombimbi chieshtoenquio icquin ëmbi chiacpadomboen naquidombo ëbëdtan chuiquid dapabo icmendac. Adoac ëbëdtan matses utsibo abitedi namendac.

²⁷ Aden Nuquin Papan aido ëbëdta chuiquid dapa icmiacsho utsibon: ‘Dëniacquin ëmbiquen nanu,’ catiapimbo iquendac. Ëbi chieshënquido: ‘Esus dëniacquin ëmbiquen matses namenu,’ qesho tantiashun matsu nacnenquidën ambi nacnenaid icsambo icsho isun pos-posacbimboen cuidquiendambi.

²⁸ Badiadte anoentsëc uispa dapa choded-chodedbocpadquiec ënëdenquio yec ëbi tantiaquidobëd iquendabi.

²⁹ Ëbi tantiaquido utsibotsen chuinu. Ëmbi Tiatida yacnocquido chuibocpadomboen Nuquin Papan Mayanën mibitsen pausuntsiashe. Pabi-ate cuembo icquin tantiata. Chieshtoenquio icquin ëbi tantiasho adembidi bëdambo icmendambi,” quequin ëmbi chuiboed dada uata — quequin chuiposhi Esusën.

Sadis yacnocquido Esusèn chiaid

¹ Adoshombic Nuquin Papan Mayan abi tantiaquidobèd tabadméquidquío icquin Esusèn padpiden chuiposhi. —Abi tantiaquido chuibanquid namequid nec —camenuen uispa 7tedi sananquin ismeboedèn naden chuiposhi. —Sadis yacnocquidon èbi tantiaquidon iste èmbi naden chuiboed dada uata. “Tantia, Sadis yacnocquido. Mibitedi chuinu. Mimbi naidtedi tantiembi. Bèdamboec tabadquido danquin utsibon: ‘Bèdambo icquido nec,’ mibi canubi èmbien adotiapimbo iquec. Mibi bèdapenquío iquec. Unèsacimboen mimbi èbi bèdamboen tantienquío iquec.

² Isucunacimboen èbi padpiden tantiaquiota. Nuquin Papan chiacpadomboen mimbi nauidtsèccoque. Mimbi èbi tantienquío iqueque. ‘Nuquin Papan chiacpadquiec bèdamboec tabadnuna. Esus tantiaquionona,’ cananta.

³ Mimbi èbi tantiabenondacpadomboen èbi tantiaquiota. Bèpiscudenda. Nèbi mibi icsaid ènshun èmbi chiacpadomboen naoata. Isucunenquío yacimboen èbi tantienquío icshoembi mibi cuidendac. ‘Ampequid choec,’ quequin tantienquío yacimboen èmbi cuidte tantienquío icsho mibi cuidtsiambique. Èbi tantiaquiota.

⁴ Mibi yacno icsaquido dadpen tabadnubi utsi-utsiec daèdpactsèc ambi naid icsa.ucudacimboec icsainquío yec bèdamboec tabadec. Adec bèchish.ucudacimboec abi icsaid ènash bèdamboec tabadsho isun èbèdi tabadméquín icsaisa icmendambi.

⁵ Èbi tantiaquido utsibotsen chuinu. Èmbi chuibocpadquidèn chieshtoenquío icquin èbi

tantiasho adembidi bédamboen isun Nuquin Papa yacno ëbëdi tabadmequin icsaisa icmendambi. Aido cuëmëdquid cuëmëdquidquien Nuquin Papa chuibanendambi. ‘Aido ëbi tantiaquidotedi neque. Nuquibëd tabadmenuna,’ quequin adoendambi Nuquin Papan abi yacnoshon uaido mayan bédabontsen tantianuc. Aden dada uaid ucudenquoio yachimboen bëshunenquoio icquin ëbëdi tabadtequido abitedi tantiemi.

⁶ Ëmbi Sadis yacnocquido chuiboed Nuquin Papan Mayanën mibitsen tantiametsiashe. Pabiate cuembo icquin bédamboen tantiata. Chieshtoenquoio icquin ëbi tantiasho adembidi bédambo icmendambi,” quequin ëmbi chuiboed dada uata — quequin Esusèn chuiposhi.

Pidadepia yacnocquido Esusèn chiaid

⁷ Adoshombic icsaisambo icquin ambi chiacpadomboen naquidënquoio Esusèn padpiden chuiposhi. Con tsusedpa Dabid yampicpadquid mates namequidquoio yec ambentsëqui Nuquin Papa yacno puduedmequid nec utsibon: —Padi —catiapimbo icnuc. Abi tantiesabo cacumequid Esus nec. Aidën naden chuiposhi. —Pidadepia yacnocquidon ëbi tantiaquidon iste ëmbi naden chuiboed dada uata.

⁸ “Tantia, Pidadepia yacnocquido. Mibitedi chuinu. Mimbi naid tantiemi. Mibi yacno ëbi tantiaquido daëdpactsëc iquec. Adquid yec: ‘¿Ada nuquitedictsëqui chieshtoenquoio icpatsiaba?’ queded-quededtsëcquien mimbi ëbi tantiaquioc. Chieshënaqui: ‘Esus tantiatiapimbo iquebi,’ quenquoio mibi iccoc. Adec chieshtoenquoio icsho

isun ëmbi namiac ëmbi naid mimbi chuiban-chuibanendac utsibon ëmetiapimbo icquin.

⁹ Aden isadaidbon mibi ëmetiadquio iquec. Aido: ‘Con matses isadaidboudtsëqui Nuquin Papan bëdamboen isendac,’ quec muaboedo Satanasën yuabo niosh. Ëmbimbo namiac mibi yacno chochoso mimbi chuibanendac. Adoac: ‘Ai, abimboen mimbi caoc. Nuquin Papan Madon Esusën tantiaidombo mibi nec,’ aidon mibi caindac.

¹⁰ Ëmbi chiacpadec chieshtoenquio icquin ëbi tantiasho isash mibi cudasendabi. ‘¿Ada Esus tantienquio yantsiashe? Tanu,’ queshun nidaid utsi-utsiec yacno tabadquido abitedi Satanasën natiambo icmendac. Adosho mibi chieshtoenquio icquid icmendambi.

¹¹ Tantia. Nëbi choendabi. Utsibon chieshënaqui mibi icbocpadquiec chieshtoenquio yec bëdamboec tabadta. ‘Ëbi adenquio icsho isun Esusën abi yacno puduedmenquio ictsiashi,’ quiash bëdamboec tabadta.

¹² Aden chieshtoenquio icquin ëbi tantiaquido utsibo abitedi Nuquin Papa yacno yuedendambi. Buintad nitsinaid chiquidtiapimbo yacbimboecnuc con shubun icquido mibi icmendambi auëshquio cuentiapimbo icnuc. ¿Mitsipaden icbon: ‘Con na nec,’ quequin abi cuëmëdquid dada uaquin ismepec? Adembidi abitedi ismequin: ‘Con Pabëdtan con matses nec,’ mibi caindambi. ‘Nuquin Papa yacno ëbi tabadaid Edusaden chuca caid abucuësh budtequid yacno tabadtequidombo nec,’ mibi caindambi. Nuquin Papan abitedishun Icbombo icmiac ëbëdtambi chuiquid mibi icmendambi.

13 Ëmbi Pidadepia yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiatata. Chieshtoenquo icquin ëbi tantiasho adem-bidi bëdambo icmendambi,” quequin ëmbi chuiboed dada uata –quequin Esusën chuiposhi.

Daudiseya yacnocquido Esusën chiaid

14 Adoshombic abitedishun naid tantiaquin abimbo chuiquidënquo Esusën padpiden chuioaposhi. Nidaidbëdta abitedi uaquidënquo abitedishun Icbon chuiposhi naden. –Daudiseya yacnocquidon ëbi tantiaquidon iste naden ëmbi chuiboed dada uata. “Tantia, Daudiseya yacnocquido. Mibitedi chuinu.

15 Mimbi naid tantiembi. Chieshtoenquo icquin ëbi tantiaquid ictiadquidi adquidpenquo mibi nec. ¿Ëbi bëdamboen tantiaquidon adopen-dactic? Padenquo. ‘Esus tantiaquid nebi,’ quiondaidëmbi mimbi naiduidi naquin mimbi ëbi bëdiactsëc tantiatsëccoc. Adsho tantiashun: ‘Day-acquo yacbimboen ëbi tantiaquiopashun,’ caimbi mibi.

16 Mibi adec chieshtonoc ëbitsen chieshtotiadquo iquebi. ‘Cacumiacbimboen Nuquin Papa yacno ëbëdi mibi tabadmenquo iquendambi,’ mibi catiadquo icchitebi.

17 ‘Nuquin Papan chiaid niac-niaquec icsapobi,’ quetiadquidi: ‘Ëmbembi con na dadpen bedshun dayun uaic utsi bunenquo yec bëdambo iquebi,’ mibi quepoc. ‘Esus tantienquo yec Nuquin Papabëd tabadtiapimbo icchitebi,’ quetiadquidi mibi adenquo iccoc. Nuquin Papa yacno

tabadte tantienquo icscho isun mibi shubiuati-adquo iquebi. Bëchish ucabi yachimboen mibi icsaid ënabi icscho mibi bëdamboen istiapimbo iquebi. Pacuënëdachimboen ëbi tantienquo mimbi iquec.

¹⁸ Adboedëmbi Nuquin Papabëd tabadte bunquin ëbi tantiaquiota. Ëbi tantiaquin bëchish ucachimboen mibi icsaid ënta. Adsho icsaisabimboecnuc mibi bëdamboen isquin ëbëdi tabadtequid icmetsiambique. Pacuënëdaid paposhquiacbimboecnuc ëmbi naid mibi bëdamboen tantiametsiambique. Ëbi tantiata.

¹⁹ Ëmbi tantiaido bëdamboen tantiamembi. Aton papan: ‘Padi, mibi icsambo iquec,’ quequin bacuë ëmiacimboen ëbi tantiaquido icsasho isun ambi naid ëmenuequin natiambo icmendambi. Ëbi tantiaquin mimbi icsamboen naid ënash bëdamboec tabadta.

²⁰ Mibi tantiaquiembrie. ‘Ëbi tantiata,’ ëmbi cac mibi: ‘Ai,’ qesho tantias mibëd iquendabi. Pec tabadec bëisnanguiacbimboec mibëd iquendabi.

²¹ Tantia. Ëbi tantiaquido utsibotsen chuinu. Chieshtoenquo icquin Nuquin Papan chiaidtedi naquin nainash aidbëdi tabadquid nebi. Adquid yec aidbëdi abitedishun Icbombo nebi. Adembidi ëmbi con Pan chiaid nacpadec chieshtoenquo yec ëbi tantiec tabadsho ëbëdi tabadmequin ëbëdtan chuiquid icmendambi.

²² Ëmbi Daudiseya yacnocquido chuibocpadomboen Nuquin Papan Mayanën mibitsen pausuntsiashe. Pabiate cuembo icquin bëdamboen tantiata. Chieshtoenquo icquin ëbi tantiasho adembidi bëdambo icmendambi,” quequin ëmbi chuibod dada uata —quequin chuiposhi Esusën.

4

Nuquin Papa Uanën isaid

¹ Asia yacnocquido Esusën ëmbudquin chuibon abuc ispombi. Adshun isquien shëcuë shëcniacimboec isadpec. Adnubien chuibocpadquiec shoncacimboec comapenec onqueoaposh. —Nëmbo cho. “Nadquid iquendac. Nadotsiandac,” quequin mibi dadpen ismenu —caposhi.

² Adoac Nuquin Papan Mayanën tantiamiac ambo nidacimboen ispombi. Ushquin isacimboembimbi caindac. Adshun isquien Nuquin Papanbo chuiquid dapan tsadte dapanquio tsadpec.

³ —Chuiquid dapa abentsëcquiobi nec. Bëdamboshë iquec —camenuc matses bunaidquio casëdubimboec nac-nacquoio yec piumbo yec bëdamboshë isadposh. Abi tsadaid nënantanquio uenquebudpamboec uen podquedbipamboec umu-umupambo icposh. —Bëdamboshë icquidquoio nec —camenuc adquoio icposh.

⁴ Nuquin Papa nënantan icnuc abi dacuenadec matses tsusiobo Esus tantiaquido chuiquid 24tedi icquido tabadposh. Chuiquid tsadte utsi 24tedi tsadte icnuc icho-icboec aid tsadten tabadcuededposh. Abëdi tabadmequin Nuquin Papan icsaisa icmiaido yec ushumboshë icquidquoio dasiuidcuededposh. Chuiquid dapan mauetempo shocosh nacnenaidquoio mauecuededposh.

⁵ Adnubien Nuquin Papa yacnuësh abubimboec bed-bedquetanenubien abu tesquianiacimboec

cuëdtoposh. —Abitedishun Icbombo nec —
 camenuc adec cuëdposh. Nuquin Papan
 bëntsiaucquio tabote taboaid 7tedi icnuc tabëcaid
 icposh. —Aton Mayan abentsëcshun Nuquin Papa
 bëisquioquimbi abi tantiaquido chianequid yequi
 Esus tantiaquidobëdtsen icoaic —camenuc aden
 ismeposhi.

⁶ Bëntsiaucbidi actepenquio chian dapa acte-
 actectsëcquio isadposh.

Nuquin Papa tsadaid anoen daëdtsëcquio abi
 dacuenadec aben icquidbimboecquid 4tedi ic-
 posh. Dadano chedobi ëshë ictsëcquieic icposh. Utsi
 tanenquio. Abimboudquio istequidquio icposh.
 Cachoc icnubi tachiduc adquiobidi icposh.

⁷ Abentsëc bëdi dapambo tëbuchoquidbimboec ic-
 posh. Utsibic baca bënëbimboec isadposh. Utsi-
 bic matsesën bëtantetebimboec bëisadposh. Utsibic
 chiqui dapabimboec isadposh.

⁸ Icho-icboec aton podo uicchunën
 podobimboec 6tedi icposh. Podonotsen
 adquiobidi ëshëuidquio isadposh. Podo ananquio
 adquiobidi icposh. Aidonquiobi ënenquio icquin
 Nuquin Papa chuiposh nadec cuëdënquin.

—Icsaisambo yec bëdamboshë icquidquio mibi nec.
 Abitedishun Icbombo mibi icnuc mibipadquid
 utsi nibëdec.

Abitedimbo tantiaquidquio mibi icnuc mimbi
 tantiacmaid nibëdec.

Matses uabi yec icpampidi mibi nec. Nëbi adquid
 yec mibi nibëdantiapimbo icquidquio nec
 —quc badiadquidën badiadquidënquieic
 cuëdënashic inchëshëntsen cuëdëdeneposh.

9 Aden dadanobi èshëcquidon: –Mimbi nac bēdambo iquebi. Mibi bēdamboshë iquec, Papa. Abitedishun adembidi: “Bēdambo iquec,” mibi cac bēdambo ictsiash, Papa –Nuquin Papa cadonenubi

10 tsusiobo 24ted icquido ambo tabadquido danëshën tinquebudcuededposh. Adtanquimbi mauete chichededtanquin Nuquin Papan tayun sambededposh: –Abitedishun Icbombo mibiuidtsëqui nec –quequin. Adotanquimbi aidontsen Nuquin Papa chuiposh nadec cuēdënquin.

11 –Mibi bēdamboshë iquec, Papa. Adembidi abitedishun mibi: “Bēdambo iquec,” capashun.

Abitedishun Icbombo mibiuidtsëqui nec.

Chuiquid dapambo abentsëcquiobi mibi nec.

Mibipadquid utsi nibēdec.

Nadatiambo icquidquio mibi nec.

Comapenen tantiaquidquio icquin mimbi abitedimbo uapampic.

Mimbi tantiacpadomboen mimbiuidtsëcquiobi abitedi uapampic.

Adoac mimbi tantiacpadequi mimbi uaido nibēdanabi yec abi iquec.

–quec tsusiobo cuēdëncuededposh.

5

Nuquin Papan chiacpadomboen namequid Esus isadaid

1 Adshun isquien Nuquin Papan abiucshun ambi chiaid dada uaid sanampec. Abiuc daēdi dada uaid bidicabanquin: –Istemaidën isnushe –qeshun 7ted icnuc bitaccatempin bitaccabanaid neposh.

² Adnubien Nuquin Papan abi yacnoshon uaid mayan bëda chuiquid dapa comapenec onqueposh. —¿Tsuntsin nëid dada uaid bedshun bitaccaid chicbanquin chuibampatsiash? —quedoquedoposh. —¿Tsuntsin Nuquin Papan chiaid bedshun isquin ambi chiacpadomboen naquin naimepatsiashba? —quequin tantiec adposh.

³ Adoaquien ëcbedanenquio icposh abitedimbo. Nëidic Nuquin Papabëd tabadquidotedi. Nëidic nidaidën tabadquidotedi. Nëidic unësaidotedi. Aidtedi dada uaid bedshun bitaccaid chicbanquin istequid nibëdposh.

⁴ Adsho isashini unësquio icnuc shubipoc: —Aid dada uaid bedshun chicbanquin chuibanquid nibëdec —quiash.

⁵ Adshobini anocquid tsusion: —Otac. Shubienda. Ënëd. Is. Dada uaid bedshun chicbanquin chuibanquid abi iqueque. Nuquin Papan matsesmequin chomiondaidquio neque. Aton tsusedpa Uda yampid icnuc aton tsusedpa utsi Dabidbimboecquid chuiquid dapambo nec. Utsibon dëniacadiapimbo icquid nec. Aidëmbi chieshtoenquio icquin Nuquin Papan chiacpadomboenuidi naquidquio icquin aid dada uaid bedshun namendac —caposhi.

⁶ Adoac isquien isadaidbon Nuquin Papa cuidmenquio icnuen abided unës uaid obeca bacuëbimboecquid Nuquin Papabëd abi tsadacnombo isadtsec. —Matses icsaid bedshunec abided cuidadec unësaid Esusquio nec —camenuc adec isadposh. Utsibo dacuenadec tabadnuc nënantanquio Nuquin Papabëdquio icposh. Anoentsëqui dadanobi

ëshëcquido dacuenadec tabadnuc abi uquëctšëc tsusiobouidquio dacuenadec tabadposh. Padnuc obecabimboecquid yec aton pais 7tedi icnuc aton èshëmbo aitedquibidi icposh. –Abitedishun Icbombo yec utsin dëniacdiapimbo icquid Esusquio nec –camenuen aden pais ismeposhi. Adembidi: –Aton Mayambidi Nuquin Papan Mayan yec nidaid utsi-utsiec yacno matses abitedi yacno nidmiaid icnuc ompodëmëdtiapimbo icquid Esus nec –camenuen èshë 7tedi ismeposhi ushquin isacbimboecnuc.

⁷ Adshumbic obecabimboec isadboedën Esusèn Nuquin Papan abiucshunquio sananaid dada uaid bedposh.

⁸ Bedsho istanequien dadanobi èshëcquidobëd tsusiobo 24ted icquido Esus ismec danëshën tinquebudcuededposh. –Bëdamboshë icquidquio mibi nec –quiash adcuededposh. Tsusiobon icbo-icboen ten-tencate sananquimbi utsiucshun shocoshëmpi bëdambo nuadnuc tautitempi sanamposh. –Ëmbi ten-tencamequin Nuquin Papa cuishoncamiacbimboec Esus tantiaquido cuëdënaid iquec –quequin aden ten-tencate sananquin ismeposhi. Adembidi: –Nëshun tauiac nëid pushudquid Nuquin Papa yacno nidacbimboec Esus tantiaquidon chianiaid iquec –quequin bëdambo nuadnuc tautitempi sananquin ismeposhi.

⁹ Adashic cuëdënte chucan Esus chiec cuëdëncuededposh tsusiobo.

–Mibi bëdamboshë iquec.

Nuquin Papan chiapadec matses cuidmenquio icnuec mibided ciudadec unësondaidquio

mibi nec.

Nëbi icsambo icboedombi mibi tantiasho Nuquin Papan bëdamboen isendac.

Aden Nuquin Papan chiacpadomboen naquidquio mibiuidtsëqui nec.

Mimbiuidtsëqui Nuquin Papan sanamboed dada uaid bedshun bitaccaid chicbanquin isbanquin Nuquin Papan chiacpadomboen namendac.

Mibi tantiaquidotedi Nuquin Papan bëdamboen isendac.

Nëidtedi matses caimbi. Nëidic matsesquio.

Nëidic matses utsibo.

Nëidic nidaid utsi-utsiec yacno tabadquido.

Aidtedi mibi tantiaquido yansho Nuquin Papan bëdamboen isendac.

¹⁰ Adoac min yuabo yanshun Nuquin Papa yacno mibëdi tabadquin: “Mibi bëdamboshë iquec,” caded-cadedendac.

Mimbi tantiacpadën nidaidënuësh mibëdtan chuiquid iquendac

—quec cuëdëncuededposh tsusiobo.

¹¹ Adnubien abi yacnoshon Nuquin Papan uaido mayan bëdabotsen cuëdëncuededposh dadpenquioshë. 10,000 X 10,000tedi udimbo dëniacash cuëte podotedi tambantiapimbo yactedimbo comapenec cuëdëncuededposh. Nuquin Papa Esusbëdi nënantanquio icnuc anoentsëqui dadanobi ëshëcquidouidquio dacuenadec tabadposh. Abi uquëctsëc dacuenadec tsusiobouidquio tabadposh. Aid uquëctsëc dacuenadequic mayan bëdabouidquio tabadposh.

12 Adec tabadec mayan bédabo abitedimbo cuëdëncuededposh naden chiec.

—Isadaidbon obeca bacuëded cuidac bimboec mat-
ses icsaid bedshunuec abided ciudadec
Esus unëspodash.

Esusquo bédamboshë icquidquo nec.

Adquid icsho: “Abitedishun Icho icquin Nuquin
Papan chiacpadomboen namequidquo
mibi nec,” abitedishun capashun.

Adembidi: “Mimbi uaido yec mitsana abitedimbo
nec.

Comapenen tantiaquid mibi icnuc mimbi tantiac-
maid utsi nibëdec,” abitedishun capashun.

Adembidi: “Mibi bédamboshë iquec. Mibi tanti-
aquiemi,” abitedishun capashun

—quec cuëdëncuededposh mayan bédabo Esus
tantiec.

13 Adnubien Nuquin Papan uaido abitedimbo
cuëdëndocuededposh. Abi yacnocquidotedi
yec nidaidën icquidotedi yec unësaid
uincuemiaidotedi yec acten icquidotedi yec quec
cuëdëncuededposh naden chiec.

—“Abitedishun Icbombo yec tsadte dapan
tsadquidquo Nuquin Papa bédamboshë
iquec.

Obea bacuëbimboecquid abided ciudadec unësaid
Esustsen bédamboshë iquec,” canuna,
ënenquo icquin.

“Abiuidtsëqui Nuquin Icho nec. Utsi adquid icti-
apimbo iquec.

Aidën nac nuqui bédamboshë iquec.

Abipadquid utsi nibëdec,” canuna ënenquo icquin

—quec cuëdëncuededposh abitedimbo.

¹⁴ Adsho tantiash dadanobi ëshëcquido: —Ai, abimbo caic —quenubi tsusiobo 24ted icquido: —Nuquin Icbo bëdamboshë iqueque. Ismenu —quetanec Nuquin Papabëdta Esus ismec danëshën tinquebudcuededposh.

6

Bitaccaid chicaid chiaid

¹ Adnubien Esusën Nuquin Papan: —Nadoendambi —quequin chiaid dada uaid 7tedi bitaccaid tauamboen abentsëc chicposh chicabi icquid 6tedi icnuc. Aid chicnubien Nuquin Papabëd icquid dadanobi ëshëcquidën abentsëcshun abu cuëdacbimboec comapenec cuëdquin: —Cho —caposh.

² Adoac cabayo ushumbo icquid catsadec dada canti sanampamboec chosho ispombi. Adec chosho isun: —Mibi chieshënquido uesquin cuesun secaquidquio mibi nec —quetanquin chuiquid dapan mauetempo mauemeposh. Adoac adecbidi abi chieshënquido cuesun secanuec nidposh.

³ Adnubien Esusën dada uaid bitaccaid utsi udictsëcquid chicposh chicabi icquid 5tedi icnuc. Aid chicnubien dadanobi ëshëcquid utsin: —Cho —cac

⁴ cabayo piumbo icquid catsadec dada choposh. —Matses cuesun secananenquio icsho Nuquin Papan tantiacpadomboen aidën nac matses abitedimbo matses utsibobëd cuesun secananendac —queshun chështe dapa matses siante dapa meneposh. Adomboen Nuquin Papan matses cuidte tantiameposhi.

5 Adnubien Esusèn dada uaid bitaccaid udictsècquid chicposh chicabi icquid 4tedi icnuc. Aid chicnubien dadanobi èshècquid utsintsen: —Cho —cac cabayo chëshëmbo icquid catsadec dada choposh. —Pete daèdpactsèc icmete chiec —camenuen pete yuè tante sanamposh.

6 Adnubien dadanobi èshècquido dacuenadec tabadnuc nēnantanshunquio Nuquin Papan cabayo chëshëmbo icquid catsadquid chuiposh. —Pucquid dadpenquio meniac aton yuè daèdpactsècnuc tambanshun pete utsi-utsien daèdpactsèc menianquid iquendac —quequin pete utsi-utsiec nibèdte chuiposh. Adshumbic: —Pete utsi-utsien nibèdmetanquin tiedèn icquid pete utsi-utsien nibèdmenquio icquin nata —quequin chuiposh. —Nuquin Papan cuidac adec pete nibèdnuc matses pete bunquiendac —quequin cuidte utsi aden ismeposhi.

7 Adnubien Esusèn dada uaid bitaccaid udictsècquid chicposh chicabi icquid 3tedi icnuc. Aid chicnubien dadanobi èshècquid utsintsen ènquimbi chuiquin: —Cho —cac

8 cabayo bèdiactsèc ushu-ushupactsècquid catsadec dada choposh. —Aid matses unès uaquid nec —quequin cuènsho tantiombi. Abipadquid utsin chinumposh. —Aidombi Nuquin Papan tantiacpadomboen matses cuidquin matses dadpenquioshè unès uabudnendac. Aidon namiac cuesun secananec dadpen naimèdbudnendac. Bunambi aidtedbidi unèsbudnendac. Daicsaidèmbic aidtedbidi. Aben icquid uinsadpambo icquidèn aidtedbidi acshun secaindac —quequin Nuquin Papan cuidte utsi

ismeposhi.

⁹ Adnubien Esusën dada uaid bitaccaid utsi chicposh chicabi icquid 2tedtsëqui icnuc. Aid chicnubien Nuquin Papa yacno isombi. Abi tantiate nëish pichicate dapa dayun chieshënquidon cuesun secaido Esus tantiaquido tabadsho ispombi. Aido chieshtoenquio icquin Nuquin Papan chaidbëdta Esusën naid chuibanec bëdamboec tabadsho aden cuesun secaido niosh.

¹⁰ Adoaido icquin comapenec cuëdquin Nuquin Papa chuidoneposh. –Abitedishun Icbombo icquin mimbi tantiacpadomboen namequidquio mibi nec. Icsaisambo yec muesambo mibi neque. En chui, Papa. Nidaidën tabadquido ëbi chieshënquin cuesun secaboedo ¿tedectsishun mimbi cuidpe? –caquin chuidoneposh.

¹¹ Adoaquien: –Chiata. Yuec-yuecpactsëcshun naindambi. Min utsibobimboecquido ëbi tantiaquido utsibo ëmbi tantiatedi chieshëmënquidon ma cuesun secabono. Adoacsho isun cuesun secanquido cuidendambi –queposh. Adshumbic Nuquin Papan: –Ëbëdi tabadmequin icsaisa mibi icmimbi –qeshun abitiombi dasiuidbudte ushumbo icquid dasiimbamposh.

¹² Adshumbic Esusën dada uaid bitaccaid utsi chicposh chicabi icquid abentsëc icnuc. Adnubien nidaid abichobi shëc-shëcquemboec comapenec uëdëqueposh. Nidaid uëdëquenubi abucuësh chënquequidtedi dacuëdampambo yamposh. Ushë dashcute chëshën bëpucacimboec inchëshquio icposh. Inchëshën ushëbic intacimboec piumboshë isadposh.

¹³ Uispabic natiambo cunquenuc cuëte bacuë tididiquiachimboec nidaidën tididieposh.

¹⁴ Abubic dashcute bidiquiachimboec isadposh. Macuësh dapabic abitedi manëdcuededposh. Acte nënantan nidaid icquidic abitedi manëdcuededposh.

¹⁵ Adsho isashien Esus tantiesabo abitedimbo: —Ashibi cuidpec —quetanec ompodec cuemposh. Nëidic chuiquid dapabo dadpenquio. Nëidic aidobëdtan chuiquid utsibo. Nëidic sondado chuiquid dapabo. Nëidic aton na dadpen dayun uaquido. Nëidic cuesambo icquido. Nëidic matses yuabo. Nëidic matsesën yuacmaido. Aidtedi matses icsambo icquido abitedimbo sidquetanec ompodec cuemposh. Utsi-utsiec nidaid shëcuë dapan ompodnobi utsi-utsiec macuësh dapa yacno cuënote dapa dayun ompodposh.

¹⁶ Ompoduidtsash: —Macuësh dapa cuitiadbudnec sebudnequin mabëspashuni. Nuquin Papan istuidshun cuidnushe —quenubien utsibo: —Cuënote dapa abucuësh paëdbudnequin ompopashuni. Nuquin Papan istuidshun cuidnushe. Adembidi abided cuidadec unësaid Esusëntsen cuidnushe.

¹⁷ Aidon ambi tantiacpadënquiobini nëbimbobi cuidchitec. Padtembo. ¿Tsutsi cuidenquio icpatsi-ashba? —queposh. —Nadomboen Nuquin Papan abi tantiaquido cuesun secaquido cuidendac —quequin aden ismeposhi.

7

Isadaidbo Nuquin Papa tantiaquidombo bësiaid

¹ Aden Nuquin Papan cuidte ismeboshombic Nuquin Papa abi tantiaquido cudaste ismeposhi.

Ismiac Nuquin Papan abi yacnoshon uaid mayan bédabo 4tedi nidaid abichobi dacuenadec tabadsho isombi. Aidon cunquequid dapa 4tedbidi icbo-icboen uidèn uaquin cuncamenquio icposh. —Nuquin Papa: “Ma cunquequidèn icsa uabanu,” quiabi icnuc abembi cunquequidèn nidaid yec acte yec cuète yec quenuc icsa uanushe —qeshun adoposh.

² Adnubien mayan bëda utsi ushë choacmiuësh choposh. Nuquin Papa abi tantiaquido cud-asëmenuen dada uaquin bësete sanamposh. Aidèn cunquequid uidèn uaquido comapenec onquequin chuituidposh.

³ —Chiata. “Nidaid yec acte yec cuète yec quenuc icsa uanushe,” qeshun adembi cunquequid uidèn uata. Nuquin Papa tantiaquido bësebambono. Nuquin Papan matses neque. “Icsambo icquidobëdta cuidnushe,” qeshun bësebambono —quetanquin Nuquin Papa tantiaquido bësebamposh ushë choacmiuësh choquidèn.

⁴ Adshumbic ambi bësebamboed tambanquin chuibamposh. —Bëseboedtedi Acobo caidèn madotedi 12ted icquidon matses tsyuecquido nec. Aidtedi tambanac 144,000tedi icposh dadpenquioshë.

⁵ Nëidic Acobo caidèn mado Uda caidèn matses tsyuecquido 12,000tedi. Nëidic Acobon mado-bidi Duben caidèn matses tsyuecquido 12,000tedbidi. Nëidic Acobon madobidi Cad caidèn matses tsyuecquido 12,000tedbidi.

⁶ Nëidic Acobon madobidi Ased caidèn matses tsyuecquido aidtedquiobidi. Nëidic Acobon

madobidi Netadi caidèn matses tsyuecquido aiddedquiobidi. Nèidic Acobon madobidi Manases caidèn matses tsyuecquido aiddedquiobidi.

⁷ Nèidic Acobon madobidi Simeyon caidèn matses tsyuecquido aiddedquiobidi. Nèidic Acobon madobidi Āebi caidèn matses tsyuecquido aiddedquiobidi. Nèidic Acobon madobidi Isacad caidèn matses tsyuecquido aiddedquiobidi.

⁸ Nèidic Acobon madobidi Sabadon caidèn matses tsyuecquido aiddedquiobidi. Nèidic Acobon madobidi Ose caidèn matses tsyuecquido aiddedquiobidi. Nèidic Acobon madobidi Benamin caidèn matses tsyuecquido 12,000tedbidi. Aid abitedi tsinacquin tanac 144,000tedi icposh — quequin chuiposhi mayan bēdan. Aden Nuquin Papabēdta Esus tantiaquido dadpenquioshē ismeposhi. —Adquido iquendac —quequin adoposhi.

Esus tantiaquido Nuquin Papa yacno tabadaid

⁹ Aden Nuquin Papa tantiaquido bēseboedo 144,000tedi tambanquin ismeposhombic padpiden Nuquin Papa yacnombo ismeposhi. Adoac isquien Esus tantiaquido dadpenquioshē tabadpec. Tambantiapimbo yactedi iquec. Nèidic nidaid utsi-utsiec yacno tabadquido. Nèidic matses utsibo. Nèidic matsesquio. Aiddedi Esus tantiaquido neposh. Nuquin Papa Esusbēd tabadacnombo tabadposh. Abēdi tabadmequin Nuquin Papan icsaisa icmiaido yec ushumbo icquid dasiuidcuededposh. Con matsesèn chuiquid dapa ismiacbimboen: —Nuquin Papa bēdamboshē iqueque. Ismenu —quequin niste podobiecquid sananquin uic-uiccaposh.

¹⁰ Aido comapenec cuëdëncuededposh.

—Abitedishun Icbo icquin Nuquin Papan ambi tantiacpadomboen isadaidbon obeca bacuëded cuidacbimboen aton Mado Esuseded cuidpanëdash.

Adoac nuqui icsaid bedshunuec abided cuidadec unëspondash Esus.

Aid tantiasho icsaido cuidacno nidmenquio icquin nuqui abëdi tabadmec.

Aton Papabëd bëdamboshë iquec

—quec cuëdëncuededposh.

¹¹ Adsho tantiash ambo tabadquido mayan bëdabotedi danëshën tinquebudcuededposh. —Nuquin Papabëd Esus abided cuidadaid bëdamboshë iqueque. Ismenuna —quiash adposh. Nënantanquio Nuquin Papabëd Esus tabadnuc abi uquëctsëc dacuenadec dadanobi ëshëcquido 4tedi icquiduidquio tabadposh. Abi uquëctsëc dacuenadec tsusiobo 24tedi icquiduidquio tabadnuc abi uquëctsëc dacuenadequic mayan bëdabouidquio tabadposh.

¹² Aid mayan bëdabotedi danëshën tinquebudcuededequi comapenec cuëdëncuededposh.

—Aden abi tantiaquido abëdi tabadmequid bëdamboshë iquec.

Esusbëdi Nuquin Papa bëdamboshë iquec.

Adembidi abitedishun: “Mibi bëdambo iquec, Papa,” quequin chuipashun.

Esusbëdi Nuquin Papa bëdamboshë iquec.

Abipadquid utsi nibëdec.

Comapenen tantiaquidquio icnuc ambi tantiacmaid utsi nibëdec.

Aiduidtsëqui bëdamboen tantiaquidquio nec.

Aidën nashunac bédamboshë iquebi.

Nadatiambo icquid nec. Abitedishun Icbombo nec.

“Esusbéd Nuquin Papa bédamboshë iquec,” canuna —quecuededposh mayan bédabotedi.

¹³ Adshumbic ëmbi 24ted icquid isboed abentsëcshun tsusion chuiposhi. —Ma ushumbo icquid abitiombi dasiuidquido ¿tsutsi nepec? ¿Mitsiuëshquio aido chosh? —cac:

¹⁴ —Tsaudi, tsusio. Mimbibien tantiec —capombi. Adsho tantiash: —Tantia. Mibi chuinu. Satanasën: “¿Ada chieshtoenquo ictshashe? Tanu,” qeshun natiamboshë icmiac Esus tantiec chieshtoenquo ictenedo nec. Adec chieshtoenquo icsho isun Satanasën tantiacpadomboen chieshëmëncquidon unës uapondash. Abided cuidadec unësaid Esus tantiaquido icsho icsaisa icmiaido yec dashcute ushumbo icquid dasiuidcuededposh.

¹⁵ Esus tantiaquido icsho Nuquin Papan abi yacnombo puduedmeshun aton yuabo icmepondash. Adoac Nuquin Papa yacnombo tabadquimbi abi ënenquo icquin tantiendac. Adembidi Nuquin Papan: “Con mado mibi nec. Con champi mibi nec. Nuquibi icnu. Cho,” qeshun abëdi tabadmequin bédamboen dayun uaic.

¹⁶⁻¹⁷ Isadaidbo matsesën nëish yua obeca dadpen dayun uacpaden abided cuidadec unësaidën Esusën abi tantiaquido bédamboenshë dayun uaindac padpidec unëstiapimbo icnuc. Adoac pete bunenquo iquendac. Actetsen bundoenquo iquendac. Abi yacnuësh ushën pichiquenquo iquendac. Chun mëyadenquo

iquendac. Nidaidënuësh shubidenedi Nuquin Papa yacnuësh shubitiapimbo iquendac. Nati-amiante nibëdquiec iquendac. Unësquio icmiante nibëdquiec iquendac. Bacuë shubisho anin bëucquin bëdambo icmiacbimboen abi yacnoshon Nuquin Papan Esus tantiaquido bëdambouidquio icmendac –quequin chuibamposhi tsusion.

8

Dada uaid bitaccaid nainquin chicaid

¹ Nuquin Papa yacnoshon tsusion chuibombien obecabimboec isadquin Esusën nainquin dada uaid bitaccaid chicposh. Aden chicnubien Nuquin Papa yacnuësh nadimbo icposh. –Dacuëdampambo iquec –quec media oda yec yuec-yuecpectsëc otacquio tantiec tabadposh.

² Adnubien Nuquin Papan abi yacnoshon uaido mayan bëdabo sietetedi: –Nuquin Papan chiacpadomboen nanu –quec tabadposh. Adsho isun icbo-icboen shoncate sietetedi menebamposh.

³ Adnubien mayan bëda utsi ambobidi choposh. Choash bëdambo nuadquid tauinuequin shocosh nacnenaid tauite dapa dayun nidtuidposh. Shocoshëmpin bëdamboshë nuadnuc tauitempi utsi sanamposh. Adsho isun bëdambo nuadquid nua meneposh. Adoac: –Nëid tauiac pushudquid Nuquin Papa yacno nidacbimboec Esus tantiaquidon chianiaid iquec –quequin bëdambo nuadquid sanshun tauite nacnenaid dapan tauiposh bëdambo nuadnuc.

⁴ Aden tauiac Nuquin Papa yacnombo pushudquid nidosh. –Adembidi Esus

tantiaquidon chianiaid abi yacnoshon tantiashun Nuquin Papan abi tantiaquido chieshênquido cuidendac —quequin aden ismeposhi.

⁵ Adshumbic aid mayan bēdan tauite dapan samēdquid cuēte dētsisadaid isquidquio icquid bedshun shocoshēmpin sandoposh. Aden sandotanquimbic shocoshēmpichobi matses tabadacno masiabudposh. Nuquin Papa tabadacnoshon adoposh. Adnubien bedbedquetanepamboec abu tesquianiabimboec cuēdtoposh. Adnubien nidaid abichobi sacasacaquemboec uēdēqueposh. —“Nuquin Papan ēbi chieshênquido cuidpashun,” quequin Ēsus tantiaquidon chianesho tantiashun aden Nuquin Papan comapenen cuidendac —quequin aden ismeposhi.

Shoncate shoncaquin ismiaid

⁶ Matses tabadacno cuēte dētsisadaid isquidquio icquid masiabudnubien shoncate bedboedon mayan bēdabon shoncanuen sanamposh.

⁷ Adshumbic abentsēcshumba shoncadoposh. Adnubien Nuquin Papan matses yacno uebimboecquid chomeposh. Nadquio icposh. Ue tsasi yec cuēte dētsisadaid isquidquio icquid yec intac yec quenuc chomeposh ue dapa choacbimboecnuc. Aden chomiaidēn nidaid nuamboshē taidposh. Cuēte dadpenquioshē taidposh. Uasin dadpenquioshē pichiqueposh.

⁸ Adnubien mayan bēda utsin shoncaposh 5tedishun shoncabi icnuc. Shoncanubien macuēsh dpatembi icquid nēdēnquepamboec abucuēsh paēdec chian dapa mad caid nēpaēdposh. Adnuc chian nuamboshē intac yamposh.

9 Adec intac yanaidën acten icquid dadpenquioshë unësbudneposh. Adecbidi cano dapa antabëdquidotedi abi canochobi mentoadbudneposh.

10 Adnubien mayan bëda utsin shoncaposh 4tedishun shoncabi icnuc. Shoncanubien uispa dapabimboecquid abichobi tabotebimboec nëdënnëdënnëquepamboec abucuësh budec acte nëpaëdposh. Aid acte nëpaëdboedën acte utsi-utsiec dadpenquioshë actiapimbo yamposh.

11 Aid uispa acte muca uaquid niosh. Aid nëpaëdqin muca uaid acte acash matses dadpenquioshë unësbudneposh.

12 Adnubien mayan bëda utsin shoncaposh 3tedshun shoncabi icnuc. Shoncanubien Nuquin Papan namiac chënquequidtedi icsa uaposh. Ushë cuesquinc inchëshën ushë cuesquinc uispa dadpenquioshë cuesquinc caquin icsa uaposh. Adoaquien bëdambo chënqueboedi bëdiactsëcquio chënquiantsëccosh.

13 —Aden Nuquin Papan matses cuidquiendac —quequin ëbi ismenubien chiqui dapa cuenequi matseshimboec cuëdec comapenec cuëdcuemposh. —Esus tantiesabo Nuquin Papan cuidtequido tantiac unësqioshë iquec. Shoncabi icboedon mayan bëda utsin 3tedshun shoncabanuc Nuquin Papan icsaido cuidte abentsë chotsecnuc ismendac. Aid cuidte dacuëdampamboshë iquendac —quec cuëdcuemposh abuc cuenequi.

9

Mayan bëda utsin shoncanuc isaid

¹ Adnubien chiqui dapan chiacpadomboen mayan bèda utsin shoncaposh daëdshun shoncabi icnuc. Shoncanubien Nuquin Papa yacnuësh mayan bèda badedquio budash matses yacno choposh. Adsho isun Nuquin Papan chiacpadomboen bêtashte chictempi meneposh. Podobitsi icsabo uidën uacno nidaid shëcuë uquëducquio icquid bêtashte chichte neposh.

² Aid chictempin chicaquien uquëducuësh tied nëdënquedoacbipamboec pushudtoposh. Abuc inchëshquio pushudquid icnuc ushë isadenquio icposh.

³ Adsho isaquien pushudacnuëshquio tsectsebiecquid dadpenquioshë cho-choposh. Chichumbimboec sianquidquio niosh.

⁴ Adsho isun aido chuiposh. Aton petembo caic: —Nuquin Papan tantiacpadomboen tiedën caniq-uidbëdta cuëte podo penda. Uasintsen penda. Adembidi Nuquin Papan cudasquin bësemiaido abi tantiaquido sebudnenda. Aido senquio icquin Esus tantiesabo bësiadabi icquidouidquio sebudneta —quequin chuiposh.

⁵ Adshumbic: —Unësnuc seshun secainda. Inchëshën ushë 5tedi nidmequin chichunën siachimboecnuc sebudneta —cac tsectsebiecquidën sebudnequin ismeposhi.

⁶ Aid tsectsebiecquidën siac natiamboshë yec matses unëste bunquiendac. Unëste bunquidi badedi unësenquio iquendac.

⁷ Aden tsectsebiecquid ismeposhi. ¿Mitsipadquio nidaid cudasquid sondado catsadaid cabayo icpec? Adquio cabayobimboec tsectsebiecquid isadposh. Shocosh mauetebimboecquid

mauecuededposh. Matsesën bêtantetembobi béisadposh.

⁸ Chidon tēbucshumbimboec isadposh. Bēdin shētabimboec aton shēta icposh.

⁹ Bēntsiauc shicdiadquid cudaste shocosh nacnenaïdbimboec sictsasimbo icposh. Aid abi maisi cuensho tantiac tied nēdēnquiacimboec comapenec cuēdposh.

¹⁰ Aid tsectsecbiecquid chishpichoquid yec chichumbimboec sianquidquio neposh. Inchēshēn ushē 5tedi nidmequin adquidēn dadpenshun natiamboshē icnuc matses sebudneposh.

¹¹ Abi nidmequid aton icbo Satanasën yuaido uidēn uacnuēsh choquidbidi niosh. —Unēs uanquidquio nec —quequin isadaïdbon onqueten abadon caposh. Quidieco matsesën onqueten apoyon caposh.

¹² —Adomboen Nuquin Papan abi tantiesabo cuidendac —camenuen aden ismeposhi. Chiqui dapan chuiboed tauaquin aden ismeposhi daēd ismiabi icnuc.

Chiqui dapan chuiboed utsi

¹³ Adnubien shoncate sanamboedēn mayan bēda utsin shoncaposh abentsēcshun shoncabi icnuc. Shoncanubien tauite dapa Nuquin Papan bēntsiauc tsadunaïd yacnuēshquio onquedoshon tantiombi.

¹⁴ Adec onquequidēn nēbi shoncaboed chuiposh. —Acte dapa Eupēdates caïd yacnoshon matses cuidquido mayan bēdabo 4tedi uidēn uaccoshe. Aïdo nidmetan. “Mimbi

tantiacpadomboen naic nid,” quequin chuitan —caquien chuitamposh.

15 Aden chuitanac aid mayan bēdabo 4tedishun matses dadpenquioshē cuesun secamenuen aton matses utsibo cuesun secate tantiamebeneposh. Nuquin Papan: —Adēnquiobi adoendac —quequin tantiacpadomboen adoposh.

16 Adoaquien ambi namiaido cabayo catsadquido sondado chedo matses utsibo cuesun secanuec cho-choposh. Aido tambanaidtedi chuisho tantiombi. —Dadpenquioshē iquec cuēte podotedi. 200,000,000tedi iquec —queposh.

17 Ēmbi isboedquio nadquio icposh. Abi catsadaid cabayobēdi sondado chedo shicdiadquid cudaste shictonquecuededposh. Shicdiadquid cudaste isac piumbo yec umumbo yec bēshpiu-bēshpiu icquid yec queposh. Cabayon mapi bēdi dapan mapibimboec isadposh. Ana shēcuēnuēsh nēdēnquepamboec pushud-pushudpambo yec choposh. Cachinan bacuē pisenaid nuadac bimboec asupede caid icsamboshē nuadposh.

18 Adshumbien ana shēcuēnuēsh choaidēn matses dadpenquioshē cuesun secabudneposh.

19 Aid cabayo chedon ana shēcuēnuēsh matses cuesun secate icnubi aton incuentembi mapi utsi iccondash. Nisin mapibimboecquid pianquidquio niosh. Aidēntsen matses dadpenquioshē unēs uabudnequin ismeposhi.

20 Adnubien aden Nuquin Papan cuidaidēn unēs uamiabi yaidon matsesēn abi icsaid ėntiapimbo icposh. Ambi naiduidi nabamposh. Ēntiadquidi

abi icsaquioposh. Nuquin Papa tantienquo icquin podobitsi icsabo tantiaquin ëntiapimbo icposh. Adembidi ambibi nacnenaïd ambi papa caïd ënenquo icquin tantiaposh. Utsibon shocosh nacnenaïd tantiaposh. Utsibombic cuënote. Utsibombic cuëte. Adquid ambibi nacnenshun tantiabededposh. Ambi nacnenaïd anan onquetiapimbo icposh. Pabiaten tantiatiapimbo icposh. Taën caputiapimbo icposh. Adquid papa quequin tantiabededposh. Aid tantienquo icquin Esusquo tantiatiadquidi ambi nacnenaïduidi tantiaposh.

²¹ Cuesanquidon abi cuesun secaposh. Nënëchoquidombic abi unës uabudneposh. Cuëte podo dauë icsa chodcaquidombic adembidi matses dadpen unës uabudneposh. Aton chidopenquo chudquidombic adembi utsi chudshumbededposh. Adembidi aton bënëpenquo chudmequidën abi icsaïd ëntiapimbo icposh. Adembidi aben uequidon abi chudmebededposh. Ampequidombic abi ampebededposh. Adec matses abitedi: —Nuquin Papan cuidnushe. Ëbi icsaïd ënu —quetiadquidobi adenquo icposh.

10

Mayan bëdan dada uaidëmpi pemiaid

¹ Cabayo uinsadpambo icquid ismeboshombic utsitsen ismeposhi. Adoac mayan bëda chuiquid dapa utsi dacuëdampambo icquidquo Nuquin Papa yacnuëshquo budsho ispombi. Abu

ushubimboec isadec abitiombi dasiuidbudpac-cosh. Uen podqued uenquebudachipamboec mapino icposh. Ushëbimboec bëtantete bëchamauanquiecposh. Buintad nitsinaid nëdënquiacbipamboec isquid-isquidpambo nidte icposh.

² Dada uaidëmpi bëcadotsaid sanamposh. Budash nidtuidposh. Tsiembudcuenshun taë abiucshun chian dapa mad caid nëtıncaquimbi taë opiocshon mananuc tincaposh. Ënapenquioshë icquid niosh.

³ Adashien bëdi noshquiacbimboec nuamboshë cuëdtoposh. Adec cuëdquin chiac abu 7tedec cuëdtonequin ëcbedtoneposh Nuquin Papan chiaid chuiquin.

⁴ Aden abu cuëdquin ëcbedtonesho tantiashun: — Abu cuëdquin chiaid dada uanu —queshobi: —Padi —caposhi Nuquin Papa yacnoshon chuiquin. — Abu cuëdquin chiaidtedi dada uainda. Padi. Ut-sibo chuiquin dada uainda —caposhi. Adoac dada uainquio iccombi.

⁵ Adnubien mayan bëda tsiembudcuenshun chian dapa nëtıncaquin utsiucshun mananuc tincaboedën ambibi podo abiucquio cadoposh. — Nuquin Papan isnubi abimbo chuiquidquio nebi —quequin tantiamenuen aden ambibi podo abiucquio cadoposh.

⁶ Adotanquin chuiposhi. —Tantia. Mibi chuinu. ¿Tsutsi nidaid uabi yec ëndenquimboshë icpampic? Aidi Nuquin Papa nëbi adquid yec nibëdantiapimbo iquendac. Adquid icquin abitedi uapampic. Abu uashun aidën icquidtedi uapampic. Nidaid uashun aidën icquidtedi uapampic. Acte uashun

aidèn icquidtedi uapampic. Aden abitedi uaquidèn chiaidquio chuinu. Nèbi Nuquin Papan ambi tantiacpadomboen icsambo icquido cuidquimbi abi tantiaquido abèdi tabadmendac.

⁷ Èbi padquid mayan bèda utsin shoncate sanamboedèn: “Nèbi nainquin shoncanu,” cacpadènquio Nuquin Papan ambi chiampicpadomboen adoendac –queposh mayan bèda chuiquid dapa dacuèdampambo icquid Nuquin Papan matses cuidquin naimpanuda.

⁸ Adnubini abucuësh cuèdquidèn chuiposh. — Aid mayan bèdan sanamboed dada uaid bed —cac:

⁹ —Dada uaid beccho —capombi. Adoaquien: —Nè bed. Bedshun che. Batambo icboedi min ana mucambo yanendac —caposhi. —Nèid bedshun chiacbimboen Nuquin Papan chiaid cuis-honquequin isban-isbanash mucambo yanacbinboec Nuquin Papan cuidte tantiaash shubitiadquio mibi yanendac —quequin tantiamenuen aden chuiposhi.

¹⁰ Adoac aid bedshun chiaish adquio yanobi.

¹¹ Adquio yansho isun mayan bèdabo chuiquid dapan chuioaposhi. —Nuquin Papan ambi chiaid tantiamiac matsesèn nabante dadpen mimbi chuibanendac. Nidaid utsi-utsiec yacno tabadquidon nabantebèdta chuiquid dapabon nabante mimbi chuibanendac. Aden Nuquin Papan tantiacpadomboen mimbi chuibanendac —quequin chuiposhi mayan bèdabo chuiquid dapan.

Nuquin Papan namiaidon daëdshun naid

¹ —Nuquin Papan tantiacpadomboen mimbi chuibanendac —quequin chuishumbic mayan bëda chuiquid dapan piabimboecquid tambante meneposhi. Adotanquin naden chuioposhi. — Edusaden yacno nidshun Nuquin Papa tabadte shubu uashunaid tambanta. Adotanquimbic Nuquin Papa tantiaquin bëdambo nuadnuc tauinuequin nacnenaid dapatsen tambanta. Adotanquimbic Nuquin Papa tantianuec aid shubun pudued-puduedquido tambanta.

² Shubu nuntanquio tambanshun umanucquid daquënë uaid tambanenda. “Ambo Nuquin Papa tantiesabo isadaidpembo pudued-puduedendac. Aidon Edusaden yacnoshon seta abentsë chotsecnuc matamequin dadpen icsa uabudnendac. Adash Nuquin Papa tabadte shubu uashunaid daquënë uaidën pudued-puduedendac,” queshun aid shubu daquënë uaid tambanenda. Aden Edusaden icsa uaqin seta 3tedi matamendac —quequin chuiposhi. — “Muainquio icquin Esusbëdta ëbi tantiaquidombo nec,” quequin Nuquin Papan tantiec —camenuen aden tambanaido tantiameposhi.

³ Adnubini Nuquin Papan chuiposh. —Aden Edusaden icsa uanubi matses daëdquiobi ëmbi chuiboedquio chuimendambi. “Nuquin Papan namiaid nec,” quequin matses tantiamenuen comapenen tantiaquido icmendambi. Adoac seta abentsë chotsecnuc matamequin ëmbi chiacpadomboen chuibanendac. Adquid yec: “Matses abitedi icsamboshë icsho isash shubitiadquio iquebi,” quequin icsambo icquid

abi icsaid ëmenuec dashcute icsactsëcquidquio
dasiuidendac —quequin Nuquin Papan
chuiposhi.

⁴ Adshobini mayan bëdan chuioposh. —Aido
Nuquin Papan oncamiaid daëd isadaidbo matses
tsusedpan chuiampid nendac. “Nuquin Papan
bëntsiauc cuëte odibos caid nitsinaid daëd bëdambo
icquid iquendac. Ambobidi tabote daëd bëdambo
icquid iquendac,” quequin chuiampid nendac.
“Nuquin Papan Mayanën tantiamiaidquio icquin
ambi chiaidquio chuibanendac,” camenuen aden
chuiampic.

⁵ Aden abi chuibansho abi chieshënquidën:
“Mibi cuesunenu,” caqui cuesuniadenquio
iquendac. Nuquin Papan dayun uaid icquin
ana shëcuënuësh choboedën nibëdqüecnuc
pichicacimboen abi cuesunenuequidotedi unës
uaindac. Nuquin Papan cuidte tantiamenuen
adoendac.

⁶ Adembidi Nuquin Papan cuidte tantiamenuen
Nuquin Papan Mayanën namiaidquio icquin
comapenen tantiaquin ismebanendac. Aden
ismequin nac abi nidabi yacpadequi ue choen-
quio iquendac seta 3tedi matamec. Adembidi
aidon acte intacuaindac. Adembidi ambibi
tantiacpadomboen comapenen tantiaquin
dacuëdampamboecquin matses shubimendac
Nuquin Papan cuidte tantiamenuen.

⁷ Aden Nuquin Papan chiaidtedi aid daëdshun
nainquin naindac. Aden nainshobien matses
chuiquid icsamboshë icquidën bëdi dapabimboec-
quidën abidaëdi cuesun secaindac. Satanasën
namiacpadomboen adoendac.

⁸ Edusaden yacnoshon cuesun secashun chococainquo iquendac. “Ma cuesun secaid ischitono,” qeshun chococainquo icquin podqued ansanendac. Nuquin Icbo Esus cuesten dectanacnoshonquo matsesën adoendac. Equipito yacno icpampido yec Sodoma yacno icpampido yec quequidbimboec icsamboshë icquin aden Nuquin Papan chiaid chuibanquido cuesun secaindac.

⁹⁻¹⁰ Aden cuesun secabosh: “Nuqui mëyanquid nëid daëd neque. Chococatiapimbo iquebi,” qeshun chococainquo iquendac. Adashic matses abitedimbo cuesun secaboed isbededec tabadendac. “Nuqui shubimequido cuesun secaosh,” quiash cuishonquec abëd icquidobëd menenancuededendac. Matses abitedimbo caimbi. Nëidic matsesquio. Nëidic mayu. Nëidic nidaid utsi-utsiec yacno tabadquido. Aidtedi menenancuededendac. Abentsë chotsec ushquin aden ambi cuesun secaboed isbededec tabadendac –quequin chuiposhi mayan bëdan.

¹¹ Adashic abi onquec: –Abentsë chotsec ushquin isbededec tabadbombien Nuquin Papan cuesun secaboed daëd uincuemendac. Uincuemiacsho isash cuishonqueboedobi natia dacuëdec tabadendac.

¹² Adnubi Nuquin Papan abucshun cuënquin: “Nëmbo cho,” cac abu ushu datanec cuesun secaboed daëd abuctoendac. Abi chieshënquidon isnubi adendac.

¹³ Aid daëd abuctonoc nidaid sacasacaquemboec natiambo uëdëquianendac. Nidaid uëdëquenubi shubu dadpenquo chimeshadbudnendac. Chimeshadbudnequimbi matses catashquin dadpenquo 7,000tedi unës

uabudnendac. Adnubien unësabi icquido dachuëdcuededendac. Dachuëdequi: “Nuquin Papa dachuëdampamboecquidëmbien nash. Aidquien tantiatiad,” quecuededendac –quequin chuiposhi mayan bëdan.

¹⁴ Aden chiqui dapan chuibocpadomboen mayan bëdan Nuquin Papan cuidte utsi chuiposhi. Nainquin chiabi iccoshi. Abi utsi iquec.

Nainquin shoncaquin Uan ismiaid

¹⁵ Nuquin Papan uincuemetequido daëd chuibombien mayan bëdan shoncate sanamboedën nainquin shoncaposh. Shoncanubien Nuquin Papa yacnuësh nua cuëdëncuededposh naden chiec. –Nuquin Papabëdi aton Mado Esuquidistu abided cuidadec unësaid bëdamboshë iquec.

Abi chieshënquidon naid ëmeshun aid abentsëcshumbi matses abitedimbo namendac ënenquio icquin.

Abitedishun Icho nec –quec cuëdëncuededposh.

¹⁶ Adashic Nuquin Papa yacnombo icho-icboec tsadten tabadboedobi tsusiobo 24tedi icquido: –Mibi bëdamboshë iquec –quequin ismec danëshën tinquebudcuededposh.

¹⁷ Adtanequi nadec cuëdëncuededposh.

–Nidaid uabi yec ëndenquimboshë mibi icpampic, Papa.

Nëbi adquid yec nibëdantiapimbo icquid mibi nec.

Abitedishun Icbombo mibi icnuc:

“Ëmbiquen dëniacquin namenu,” Satanasën cati-apimbo mibi iquec.

Nadatiambo icquid icquin mimbentsëqui matses abitedimbo mimbi namendac.

18 Nidaid utsi-utsiec yacno tabadquidon abi chuiquidobëdtan mibi chieshëndeneç.

Mimbi uaidtedi icsa uadenec.

Adsho mimbi tantiacpadënquio nëbi mimbi cuidendac.

Mates abitedi uincuetanquin mimbi chiaid niac-niaquec icsaquido mimbi cuidendac.

Adoshombic mimbi chiaid chuibanquidobëdta mibi tantiaquido abitedimbo mibi yacno mibëdi mimbi tabadmendac.

Chuiquid dapambobëdta chuiquidpenquio mibi tantiaquidotedi bëdambo icmequin mimbi adoendac

—quequin tsusiobon Nuquin Papa chuisho tantiapombi ushquin isacimboen.

19 Adshun isquien Nuquin Papa yacnombo con mates isadaidbon Nuquin Papa tabadte shubu uashunampid shëcniacchobi icposh. Aid shubu nuntan isaquien Moisesën ambi nacnenaid Nuquin Papan chiaid sandoampid icposh. — Ëndenquimboshë ambi chiampicpadomboen Nuquin Papan ambi tantiaidtedi nainquin naindac —camenuen aden ismeposhi. Aden ëbi ismenubien bed-bedquetanec abu teshquianiacimboec nua cuëdtoneposh. Nidaid saca-sacaquemboec uëdëqueposh. Ue dapa nuamboshë choacimboec ue tsasi choposh. —Nuquin Papambo abitedishun Icbombo nec —camenuen aden ismeposhi Nuquin Papa yacnoshon.

12

Chidobëdta nisibimboecquid dapa ismiaid

1 Adoshombic Nuquin Papa yacnoshombidi utsitsen dacuëdampamboecquidbidi ismeoaposhi. Adoac chido ushë dasiuidachimboec bëchamauanquiecscho ispombi. Inchëshën ushë tincash tsadposh. Uispa 12tedi nacnenaid mauete maueposh.

2 Bacuë nua usunec tishtiadtscëcquio yec shubibud-shubibudposh. —Isadaidbon chido Esus tishquid nec —camenuen aden ismeposhi.

3 Adnubien nisibimboecquid nuamboshë icquid choposh. Taëchopaidquio yec piumboshë icposh. Mapi 7tedi icposh. Pais 10tedi icposh. Aton mapitedi chuiquid dapabimboec mauete mauecededposh. Satanas niosh.

4 Adshumbic nisibimboecquidën aton incuente ënapen icquid uic-uiccaquin uispa dadpen bedshun nidaidën siabudposh. —Aden Nuquin Papabëd icquin Satanasën abipadquido utsibo mayan bëdabo icboedo utsi-utsien yuapampic. Aden yuash aton yuabobëdi nidaidën choshon matsesten icsamete bunquieç —camenuen aden ismeposhi. Adshumbic chidon tishacsho bacuë penuen auidi bëisquin cainuidposh.

5 Adnubien chidon dada bacuë tishposh. Bëdambo icquid matses abitedishun Icho ictequidëmpi niosh. Adshobien Nuquin Papan abi yacnombo buamposh nisibimboecquidën petiapimbo icnuc. Buanshumbic abipadquid abitedishun Icbombo icmiac. —Aden Satanasën Esus nibëdametiapimbo iquec —quequin ismeposhi.

6 Adnubien chido nëbi bacuë tishboed nisibimboecquid dapa cuenënc matses

nibëdacnombo Nuquin Papan tantiacnombo nidposh. Ambobi tabadsho isun Nuquin Papan bëdamboen dayun uaposh yuenquoio seta abentsë chotsecnuc matamequin. –Aden Esus tantiaquido Nuquin Papan dayun uaindac – camenuen aden ismeposhi.

7 Adshumbic Nuquin Papa yacnoshon padpiden ismiac nëidtedi isoapombi. Nëidic nisibimboecquid dapa Satanasquiobi. Nëidic mayan bëdabo icboedobi Nuquin Papan chiaid niac-niaquec icsash podobitsi icsabo yanaido Satanasën yuaido. Nëidic Nuquin Papabëd icquidombo mayan bëdabo dadpen. Nëidic aido chuiquid dapambo Miqued caid. Aidtedi ispombi. Adnubien Satanas nadposh. –Aton yuabo mayan bëdabo cuemiash Nuquin Papa dëniaquec ëbimbo abitedishun icbo yantsiabi – quiash nicantiadquoio icposh. Satanas chedo nidaidën nidmiabi icnuc neposh.

8 Adshumbic: –Niunchitono –quequin bedbidan-bedbidanaquien Nuquin Papan yuabo Miqued chedo uidënquoio icquido yec niadenquoio icposh. Adshumbic Miqued chedon nisibimboecquid Satanas chedo nicaposh. Aton yuabobëdta Nuquin Papa yacnoshon nicaposh.

9 Nicaquien matses tabadacno nidaidën choec Satanas chedo bud-budposh. Eba caid icsamepampid Satanas niosh. Nëbi matses dadpenquioshë icsamequin yuate bunquieci.

10 Adnubien Nuquin Papa tabadacnoshon anocquidën comapenec onquequin chuibamposh naden chuiquin.

—Aden Nuquin Papan aton Mado Esusbëdtan abi
dëniacnuequido dëniacmenquio icposh.

Nuquin Papa chieshënquidquio icquin abi tanti-
aquido chieshënquin icsamboen chuishun-
quid nec.

“¿Esus tantiaquido bëdambo icquidoda nedic? Ëmbi
natiamic aido chieshtotsiash,” quequin
Nuquin Papa chuidenequid Satanases nec.

Satanases chedo cuemiash Nuquin Papa aton
Mado Esus abided ciudadec unësaidbëdi
dëniacadtiapimbo yec abitedishun Icbombo
nec

—queposh Nuquin Papa yacnuësh cuëdec.

¹¹ Adashic padpidec auëshbidi:

—Nëbi ëmbi isac Satanasesën Esus tantiaquido
chieshtometiapimbo icposh.

Satanasesën: “Chieshtomenu,” caqui:

“Padi. Esusën yuambo nebi,” quec chieshtoenquio
icposh.

Cuidmenquio icnuec abided ciudadec unësaid
Esus tantiec chieshtoenquio icposh.

Adsho abi chieshënquidon matsesën: “Padi. Esus
tantienda. Cueschitomane,” caqui

chieshtoenquio icquin adenuidi Esus tantiasho
cuesun secameposh Satanasesën aton yua
icmiambobi.

¹² Satanases cuemiaid tantiash cuishonquenuna.

Nuquin Papa yacno tabadquidotedi nuquibi cuis-
honquenuna.

Ëbitedi cuishonquenuc nidaidën tabadquido mat-
ses yec mibi cuishonquetiapimbo iquec.

Nëshun cuemiac mibi yacno budash Nuquin Papa chieshënquiec Satanas chieshëmënquiec tabadec.

Mibi icsamete bunquiec. “Nëbi Nuquin Papan ëbi cuidquieque.

Abi tantiaquido yuashunchitono,” quec mibi icsamete bunquin mibi natiambo icmendac.

Adoac natiac mibi tabadendac —queposh Nuquin Papa yacnuësh cuëdec. Aden tantiameposhi.

¹³ Adshumbic ëmbi isadaidbon chido isboed padpiden ismeposhi. Adoac Esus tishquid isadaidbon chido unës uanuen nadancasho ispombi. —Nuquin Papa yacnoshon nicachitoshi —qeshun chieshënquin nisibimboecquid Satanasën aid chido nadancaposh.

¹⁴ Adnubien Nuquin Papan chiqui dapan podobiecquid meniäc bedanec aid podombi cuenec matses nibëdacnombo Nuquin Papan tantiacnombo chido cuemposh. Anoshombi nisibimboecquidën icsa uatiapimbo icnuc Nuquin Papan aid chido dayun uaposh. Seta abentsë chotsecnuc matamequin dayun uaposh.

¹⁵ Adnubien nisibimboecquidën: —Aid chido unës uachitono —quequin ambibi ana shëcuënshun chomequin acte dapa chido dayun uacno nua chomeposh. Aden Satanasën Nuquin Papa tantiaquido isadaidbo matses nibëdametiadquio iquec. Adembidi Esus tantiaquido nibëdametiadquio iquec.

¹⁶ Acte dapa chomiäcsho isun Nuquin Papan nidaid shëcuë uashun aid shëcuën acte nidmïosh chido yacno chiuidenquio icnuc.

17-18 Adsho isun nisibimboecquidën Satanasën nëishquioshon aid chidon bacuëbobimboecquido Esus tantiaquido chieshënquioposh. Uesquin cuesun secatiadquio icposh. Nuquin Papan chiacpadomboen chieshtoenquio icquin bëdamboen naquido Esus tantiaquido caimbi.

13

Bëdibimboecquid dapa ismiaid

¹ Esus tantiaquido cuesun secate bunquid ismeboshombic Satanasëmbidi chian dapa mad caid cuëmanshun cainquin ismeoaposhi. Aden cainubien acte uguëducuësh bëdi dapabimboecquid pudundoposh. Mapi 7tedi icposh. —Nuquin Papa caid nibëdquiec. Èbiuidtsëqui abitedishun icbombo icnu —quequin aton mapitedi bëdada uadaid neposh. Pais 10tedi icposh. Aid paistedi chuiquid dapan mauete paisën dectambampacosh.

² Aton dada bëdin dadabimboec isadposh. Aton taë uinsadpambo icquid utsi oso caidën taëbimboec isadposh. Ana shëcuë bëdi utsi tëbuchoquidën ana shëcuëbimboec icposh. Adsho isun Satanasën ambi caimboed chuiquid dapambo icmeposh. Ambi tantiaidquio tantiamequin abi icsaid namebamposh. Adoac matses abitedimbo chuiquid dapambo yamposh. Aden Satanasën matses icsamboshë icquid chuiquid dapa icmequin ismeposhi.

³ Adshumbic padpiden ismeposhi. Adoac aid bëdi dapabimboecquid acte uguëducuësh choaedën mapi abentsëc mëmuntiapimbo icnuc cuesuniaid uincuemiaid icsho ispombi. Aden

uincuemiaid icsho isash: –Comapenen tantiaquidien nechitec –queshun matses abitedishun acte uquëducuësh choboedën chuiquid icsamboshë icquidën chiacpadomboenuidi nabededposh.

⁴ Adshumbic: –Ëbi chuiquid dapa namequid mibi nec –quequin Satanas papa caquin matsesën tantiabededposh. –Aden Satanasën namiac ëbi chuiquid dapapadquid utsi nibëdec. Comapenen tantiaquidquio icnuc utsibon nuqui cuesun secatiapimbo iquéc –queshun abi chuiquid dapa acte uquëducuësh choboedtsen tantiaquioposh.

⁵ Aden matsesën tantiaid icquin Satanasën tantiamiacpadomboen Nuquin Papa chieshënquiec: –Nuquin Papa caid nibëdquiec. Ëmbiuidtsëqui namembi –quequin matses abitedimbo nameposh. Aden Nuquin Papan tantiacpadembi inchëshën ushë 42tedi nidmeposh seta abentsë chotsecnuc matamequin.

⁶ Aidën Nuquin Papa chieshënquin naden muauaposh. –Nuquin Papa caid nibëdquiec. Abi tabadaidtsen nibëdquiec. Abi yacno tabadquido abitedi nibëdquiec. Ambembi chiaid niosh –quéc muaposh.

⁷ Adshumbic Satanasën tantiamiacpadomboen Esus tantiaquido dadpen unës uabudneposh. Adembidi matses nidaid utsi-utsiec yacno tabadquido abitedimbo ambi chiacpadomboen nameposh. –Matses icsamboshë icquid matses abitedi chuiquid dapa iquendac –quequin ushquin isac bimboecnuc ismeposhi.

⁸ Aid caic matses abitedishun: –Nadatiambo icquid nec –quequin tantiaquiendac. Aid tantiaquido Esus tantiesabo nendac.

Ëndenquimboshë matses uabi Nuquin Papan tantiampicpadec abided cuidadec unësaid Esusquio tantiesabo nec. —Adquido yec Nuquin Papan: “Ëbëdi tabadmendambi,” quequin chiacmaidombo nec —quequin aden ismeposhi.

⁹ Pabiate cuembo icquin bëdamboen tantia. Esus tantiaquido icsho mibi chuinu.

¹⁰ Nuquin Papan: —Ëbi tantiaquid chieshënquin quënën nauedquido cuidendambi —caindac. Esus tantiesabon Esus tantiaquido chështen seshun secaindac. Adsho Nuquin Papan seshun secanquido cuidquiendac. Ëbi adsho tantiash mimbi nacpadequi chieshtoenquo icta. Chieshtoenquo icquin Esus tantiaquin ambi chiacpadomboenuidi nabanta.

Nidaid shëcuënuësh choboedtsen ismiaid

¹¹ Adshumbic padpiden ismeposhi. Adoac aben icquidbimboecquid utsitsen nidaid shëcuënuësh puduensho ispombi. Obecan paisbimboec aton pais daëd icposh. Satanasën ancanquidquo icmiacpadec dacuëdampamboec onqueposh. Bëdambo icquid damianquien muaquin chuibanquidquo niosh.

¹² Adsho isun Satanasën abia chuiquid dapa icmeboedën nidaid shëcuënuësh puduemboed chuiquid dapatsen icmiac abëdtambi matses abitedimbo ancaquin nameposh. Aden namequin abi chuiquid dapa acte uquëducuësh choboedën chiacpadomboen matses abitedi nameposh naden chuiquin. —Seshuniaid uincuemiondaidën nuqui chuiquid dapan chiaiduidtsëqui natiad —caposh.

¹³ Aden acte uquëducuësh choboedën abi chuiquid dapan chiaid namenuen comapenen tantiaquid icquin nidaid shëcuënuësh choboedën dadpen ismeposh. Matses dadpenshun isnubi abucshun abembi taboadaid budmequin ismeposh.

¹⁴ Aden Satanasën namiacpadomboen comapenen tantiaquin ismiac matses dadpenshun: — Abimbo caic —quequin abi chuiquid dapa icsamboshë icquidën chiaid nabededposh Nuquin Pampambo tantienquo icquin. Abi chuiquid tantiaquid nidaid shëcuënuësh choboedën: —Nuqui chuiquid dapa uincuemiaidquo icsho tantiaquin abibimboecnuc nuamboshë icnuc nacentata —cac matsesën nacenpesh.

¹⁵ Nacnenacsho isun Satanasën namiacpadomboen nidaid shëcuënuësh choboedën abi chuiquid dapabimboecnuc nacenboedi tibocameshun oncamepesh. Adoquien nacenboedquibi chuiquid dapa icsabimboec onquequin: — Ëbi tantiesabo neque. Cuesun secatan —cac yuabon abi chuiquid dapa tantiesabo cuesun secatampesh.

¹⁶ Adnubien nidaid shëcuënuësh choboedën: —Nuqui chuiquid dapan yuabo nuqui nec —quequin ancabudquin matses dadpenquo dada uaquin bësiadmepesh nëidtedi. Nëidic chuiquid dapabo. Nëidic chuiquidpenquo. Nëidic dadpen dayun uaquido. Nëidic aton na nibëdquido. Nëidic matses yuabotedi. Nëidic yuapenquo. Aidtedi matses dadpenquioshë dada uaquin bësiadmepesh. Utsi-utsien bëtanteteno bësiadmepesh. Utsi-utsien mëdante abiucquo mësiadmepesh. —Acte uquëducuësh choboedën ëbi

chuiquid dapan yuabo nec –queshun nameposh.

¹⁷ Adshumbic nidaid shècuènuësh choboedën chuiposh. –Adec èmbi chiacpadec siadambo icquido piucquidbèdta mitsana utsi menenda. Èmbi siadmiaiduidtsèqui mene –queposh. Utsi-utsiec abi chuiquid icsamboshè icquid cuëmèdquid dada uaqun bèsiadmiaid neposh. Utsi-utsiec aid cuëmèdaidbimboecquid naden 666 dada uaqun bèsiadmiaid neposh.

¹⁸ ¿Ada èmbi chuiboed tantio? Bèdamboen tanti-aquidèn: –Abi cuëmèdquidquo chienquo icquin naden 666 chuiquin dada uapac –catsiash. –Adec mases icsamboshè icquidquo chuiquid dapa yansho isun bèdambo icquid danenda –quequin ushquin isac bimboec nuc aden ismeposhi.

14

Nuquin Papan cudasènaido ismiaid

¹ Adoshombic padpiden ismiac abided cuidadec unèsaid Esusquo macuësh dapa Sion caid man- anènquo tabadsho ispombi. Abèdi abi tantiaquido dadpenquo 144,000tedi tabadposh. –Con na neque. Chèn –quequin cudasquin Nuquin Papan abi cuëmèdquidbèdta Esus cuëmèdquid dada uaqun bèsemiaido niosh. –Adec Esus tantiaquido abèdi tabadendac –quequin aden ismeposhi.

² Adnubien Nuquin Papa yacnuësh ¿midapad- pamboec cuèdtoposh? Acte nua chododoquiacbi- pamboequien niachiposh. Abu tesquianiachbi- pamboequien nechitosh. Ten-tencate dapa dad- pen icbo-icboen sananquin ten-tencachipamboec comapenec cuèdèncuededposh.

³ Adec Esusbèdi macuësh mananènquio tabadboedo 144,000tedi icquido cuèdèncuededposh. Nuquin Papa chuiquid dapan tsadten tsadacnombo cho-choash tabadec cuèdènte chucan cuèdèncuededposh. Tsusiobo 24tedi icquidobèdtan dadanobi èshècquido 4tedi icquidèn ambobidi tabadquin tantianuc adcuededposh. Abi icsaid bedshunec abided cuidadec unèsaid Esus tantiaquidon matsesènuidtsèqui aid cuèdènte chuca tantiec cuèdènosh.

⁴ Aido Nuquin Papa yacno nidabi yec nidaidèn tabadnuc matses utsibo abitedimbo icsamboecshè tabadnubi aidoen bèdamboec tabadpanèdash. Utsibon Nuquin Papa Esusbèdta tantiatiapimbo icnubi aidombien tantiaquiopanèdash. Abided cuidadec unèsaid Esus tantiaquid icquin ambi chi-acpadomboen nabampanèdash. Adonèdaid icquin Nuquin Papabèdta Esus cuishoncamequidombo niosh.

⁵ Chieshtoenquio icquin Esus tantiec muesabo icpanèdash. —Adquido iquendac —quequin ushquin isacbimboecnuc aden ismeposhi.

Mayan bëda utsi 3tedshun chiaid

⁶ Aido ismeboshombic utsitsen ismiac Nuquin Papan abi yacnoshon uaid mayan bëda uicchun cuenacbimboec abuc cuensho ispombi. Bènuytiapimbo icquid Nuquin Papan chiaidquio matses chuinuec niosh nèidtedi. Nèidic matsesquio. Nèidic matses utsibo. Nèidic nidaid utsi-utsiec yacno tabadquido. Aidtedi chuiquin Nuquin Papan matses icsaido cuidte chuinuec niosh.

⁷ Abuc cuenquimbi chuibemposh. —Nuquin Papauidtsèqui tantiata. “Abu uaquinc nidaid

uaquinc acte uaquinc caquid bēdamboshē iquec. Abipadquid utsi nibēdquio iquec,” quequin tantiata. Nēbi ambi chiaid niac-niacquido cuidquieque. Aidquio tantiata –quequin chuibemposh abuc cuenquimbi.

⁸ Adnubien mayan bēda utsi abuc cuenoaposh. Cuenquimbi naden chuibenaposh. –Shubu dadpen icquid Babidonia caid yacnocquido icpampidobimboec icsamboshē icquidobidi icsho Babidonia yacnocquido caimbi. Aidon uisma uanten danoshcachimboen matses utsibo abitedi Nuquin Papa tantiamenquio icquin icsamequiosh. Aduidequi icsho ēndenquimboshē cuidampicpadomboen Nuquin Papan uesquin cuidquiendac –quequin chuibemposh mayan bēda utsin abuc cuenquimbidi.

⁹ Adnubien mayan bēda utsitsen abuc cuenoaposh. Aidēnsen chuibenaposh. –Tantia. Nuquin Papan cuidtequido chuinu. Chuiquid dapa icsamboshē icquid acte uguēducuēsh choboed tantiakin aidbimboecnuc nacnenaaid tantiaquioposh. Aden abi chuiquid icsamboshē icquid tantiec: “Aton yua nebique. Ismenu,” quiash ambi tantiaidēn chiacpadec utsi-utsiec bēsiadcuedednubi utsi-utsiec mēsiadcuededposh. Aden abi chuiquid icsamboshē icquid tantiaquidon abi tantiatiapimbo icsho Nuquin Papan cuidquiendac.

¹⁰ Aidtedi chuiquid icsamboshē icquidēn yuabo icsho icbobēdtabi Nuquin Papan nēishēnquioshon cuidquiendac. Icsaquido cuidquiacno chian anēdēnquiacno nēsecain adoendac. Abided cuidadec unēsaid Esusēnquio mayan bēdabobēdtan isnubi adoendac.

11 Ënenquio icquin adoendac. Aden Nuquin Papa chieshënquidquio tantiec siadaido Nuquin Papan cuidquiendac. Aden cuidsho: “Chiata,” cac “Ai,” quenquio icquin adembi cuidquiendac Ënenquio icquin –quequin chuibemposh mayan bēdan. Aden ismeposhi.

12 Ëmbi chuiboed tantiashun mimbi nabocpadomboembi chieshtoenuio icquin Esus tantiaquin ambi chiacpadomboenuidi nabanta. Ut-sibon chieshënquin: –Padi. Esus tantienda. Cueschitomane –caqui adenuidi Ënenquio icquin Nuquin Papabēdta Esus tantiaquiota.

13 Adnubi Nuquin Papa yacnuësh comapenec onquequin chuioaposhi. –Naden chuiquin dada uata. Chieshēmēnquidon: “Esus tantiec,” queshun cuesun secaido Esus tantiaquido cuishonquendac –quequin chuiposhi. Adnubien Nuquin Papan Mayanēntsen: –Ai, abimbo caosh. Esus tantiaquido natiaic tabadtenedobi unēsash bēdamboshē iquendac shubitiapimbo yacno tabadec. Ambi chiacpadquiec bēdamboec tabadec unēsacsho Nuquin Papan aden bēdamboshē icmendac –quequin chuiposhi.

Intac nua icnuc Nuquin Papan cuidtequid chiaid

14 Adoshombic padpiden ismiac abu ushunquio Esus tsadsho ispombi. –Abitedishun Icbombo nebi –quec chuiquid dapan mauetembo shocosh nacenaid maueshun chēshtebimboecquid sanamposh.

15 Adnubien mayan bēda utsin abi yacnuësh choquin comapenec onquequin Nuquin Papan

chuiboed Esus chuituidposh. —Nëbi nidaidën icquid sinaid butebanquin sando. Nuquin Papan tantiacpadën nëbimbobi nata

¹⁶ —caquien chështebimboecquidën sinaid butebanquin sandoposh. —Aden Nuquin Papan tantiacpadomboen abi tantiaquidotedi bedshun abi yacno Esusën buanendac —camenuen aden ismeposhi.

¹⁷ Adnubien mayan bëda utsi Nuquin Papa yacnuëshquiobidi choposh chështebimboecquid sanampamboec.

¹⁸ Adec chështebimboecquid sanampamboec choshobien mayan bëda utsin matses tabadacno cuëte dëtsisadaid isquidquio icquid nidaid masiabudboedën tauite dapa dayunuëshquio choshon comapenec cuëdquin chuiposh. —Shancuinbimboecquid uba caid nidaidën caniquid chështebimboecquidën mëtebanquin sandoshon buanshun uba tish-tishten sando

¹⁹⁻²⁰ —caquien uba caid mëtebanquin sandoshon buanshun uba tish-tishten sandoposh. Aden abi tish-tishten sandoshon taën tin-tincaquin tish-tishaquien ënë nuamboshë yec piumbo icposh. —Intac nuambo icnuc Nuquin Papan cuidendac —camenuen aden ismeposhi. Adomboen uesquin cuidnuen Nuquin Papan matses icsambo icquido cho-chomendac. Edusaden yacno cho-chomeshun ashunquio Nuquin Papan cuidac matsesën intac nuamboshë chididiquec nua mauanendac. Acte nua chëuëdacbipamboec cabayon mapi yaction intac chëuëdsho isombi. Ënapenquio quidometedos 300ted cactiombi cuësquec nuamboshë matsesën intac chëuëdsho

isombi ushquin isacbimboen. –Aden Nuquin Papan abi chieshënquido cuidendac –quequin ismeposhi.

15

Nuquin Papan cuidtequid 7tedbidi nabanaid

¹ Adshumbic Nuquin Papan cuidte tantiamenuen Nuquin Papa yacnoshon dacuëdampamboecnuc padpiden ismeposhi. Adoac matses natiamequin cuidquido dacuëdampambo icquido 7tedi icsho ispombi. Mayan bëdabo niosh. –Aidon ambi chiacpadomboen ënquimbi matses icsaido cuidsho isash Nuquin Papa nëish bëdanendac –quequin tantiaquin ispombi.

² Nuquin Papa yacnobidi chian dapa icposh. Actepenquio yec acte-actectsëcquio isadposh. –Nuquin Papa icsaquido cuidquidquido nec –camenuec tied nëdënquiacbimboec aid bëntse isadposh. Aid cuëmambi Esus tantiaquido tabadposh. Satanasën namiaidën acte uquëducuësh choboedën chuiquid dapa icsamboshë icquidën: –Yuanu –cauidaido niosh. Chuiquid dapa icsamboshë icquidbimboecnuc nacnenaaid tantiatiapimbo icquido aido niosh. Adecbidi icsamboshë icquidën ancabudacpaden nainquio yec aton yuabo ictiapimbo yec aid cuëmëdaidbimboecquid 666 dada uaqin siadmetiapimbo icquido niosh. Adec abi tantiaquido icsho Nuquin Papan meniaid tentencate cuëdëmec cuëdëncuededposh.

³ Nuquin Papan namiaid Moises: –Nuquin Papan nac ëbi chieshënquidon ëbi cuesun

secainquo icposh —quec cuëdëmpampicpadec cuëdëncuededposh. Nuquin Papa bëdamboen ismenuec abided ciudadec unësaidquo Esus aton Papabëdta tantiec cuëdëncuededposh naden chiec.

—Nadatiambo icquin nabanquidquo mibi nec, Papa.

Abitedimbo uaquidquo yec abitedishun Icbombo mibi nec, Papa.

Matsesën naid abitedi tantiaquidquo abimbo chuiquidquo mibi nec, Papa.

Mimbi naid bëdambo icnuc dacuëdampambo mibi iquec, Papa.

Nidaid utsi-utsiec yacno tabadquidon Icho icpampidi adecbidi matses abitedishun Icbombo mibi nec.

⁴ Matses abitedishun: “Nuquin Icho dacuëdampambo icquid neque.

Ambi chiacpadomboen nanuna,” mibi capashun, Papa.

Mibiuidtsëqui icsaisambo nec, Papa.

Adquid icquin mimbi chiacpadomboen icsaquido cuidquimbi bëdambo icquido mimbi bëdamboen isendac.

Adsho isun nidaid utsi-utsiec yacno tabadquidon matses abitedishun: “Mibi bëdambo iquec. Con Icbombo mibi nec,” caindac

—quec cuëdëncuededposh Esus tantiaquido.

⁵ Adshun isquien isadaidbon: “Nuquin Papa tabadte nec,” quequin shubuampicpadquid shubu shëcniacchobi icposh. Nuquin Papa tabadacnombo tantiamenuen aden ismeposhi.

⁶ Auëshquo Nuquin Papan chiacpadec ëmbi isboedo mayan bëdabo 7tedi cho-choposh. Matses

icsaquido cuidquido niosh aido. —Nuquin Papan yuabombo nec —camenuc dashcute nac-nacquoio icquid dasiuidcuededash dashcute bëshpiu-bëshpiumbo icquid shictonguecuededposh.

⁷ Adsho isun Nuquin Papaböd icquid dadanobi ëshëcquid abentsëcshun maspanëmpi shocosh piu nacnenaïd icbo-icboen menebamposh. Ünëstiapimbo icquidën Nuquin Papan nëishënquishon cuidte cushtoaid maspanëmpi niosh.

⁸ Adnubien Nuquin Papa tabadaïd nuntanuësh pushud-pushudpambo icposh. Adec dacuëdampamboecsho isash Nuquin Papa chuïnuëc puduedtiapimbo icposh. Ënquin cuidambi padpidec Nuquin Papa yacno puduednushi niosh. —Abitedishun Icbombo yec dacuëdampambo icquidën ambi tantiacpadomboen icsaquido uesquin cuidendac utsibon: “Chën,” cadiapimbo icquin —camenuen aden ismeposhi.

16

Maspanëmpin cushtoaid

¹ Adec pushudacnuësh abi tabadacnuësh Nuquin Papambo cuëdsho tantiombi. Maspanëmpi bedboedo chuiposh. —Matses yacno nidshun maspanëmpin cushtoaid chiuinquin matses uesquin cuidta —quequin chuiposh Nuquin Papan.

² Adoaquien abentsëcshun ambi bedboed maspanëmpin cushtoaid nidaidënshun chiuimposh. Adnubien ëmbi isboed acte uquëducuësh choëd chuiquid dapa icsamboshë icquidën yuaidotedi natiambo yec chiuë-chiuëtsëcquoio yancuededposh.

Satanasën namiaidquoio icsamboshë icquid tanti-aquin abibimboecnuc nacnenaaid tantiaquido yec aton icbo cuëmëdquid dada uaqin siadmiaido icsho aden cuidposh.

³ Adnubien utsin ambi bedboed maspanëmpin cushtoaid chian dapa mad caid nëchiuimposh. Adoaquien aid chian mad caid intacac. Ënden unësaidën intacbipamboecnuc intacuac. Intacuidpambo icnuc acten icquidtedi unësbudneposh.

⁴ Adnubien utsintsen ambi bedboed maspanëmpin cushtoaid acte utsitedi nëchiuimbeneposh. Nëchiuimbeniac aidtsen intacposh.

⁵ Adsho isun mayan bëda utsin acte dayun uaquidën Nuquin Papa chuiposh.

—Aden mimbi cuidsho isun: “Mibi bëdamboshë iquec,” caimbi, Papa.

Nidaid uabi yec ëndenquimboshë icpampidi mibi nec.

Nëbi adquid yec mibi nibëdantiapimbo icquid nec.

Adquid yec abitedishun Icbombo mibi nec.

Icsaisa icquin mimbi chiacpadomboenuidi mimbi naic.

Muesambo mibi nec.

Aden mimbi chiacpadomboen mimbi icsaquido cuidec, Papa.

⁶ “Ëmbi chiaid chuibanquidobëdta ëbi tantiaquido nua intac icnuc chieshëmënquidon cuesun secabudnepondash,” qeshun

cuesun secanquido cuidquin mimbi aton acte intacuashunacsho isun: “Mibi bëdamboshë iquec,” caimbi, Papa

—queposh mayan bëda acte dayun uaquid.

⁷ Aden acte dayun uaquidèn chuisho tantiash Nuquin Papa tantiaquin nëish pichicate dapa yac-nuëshquio utsi cuëdposh. —Ai, abimbo caic, Papa. Abitedishun Icbombo icquin comapenen tanti-aquidquio mibi nec. Adquid icquin matsesën naidtedi mimbi tantiec, Papa. Icsambo icquidon naid abimbo chuiquin mimbi aido cuidec. Adsho isun: “Mibi bëdamboshë iquec,” Papa, caimbi — queposh mayan bëda utsi.

⁸ Adnubien utsintsen ambi bedboed maspanëmpi cushtoaid badiadën ushë bëchiuimposh. Adoaquien Nuquin Papan namiacpadec matses baded-badedquiec ushën pchiebudneposh.

⁹ Adec pchiebudneshumbien Nuquin Papa chushcabededposh. —Icsauidequi icsho Nuquin Papan nuqui cuideque. Nuqui icsaid ënash ambi chiacpadec bëdamboec tabadnuna — quetiadquidëmbi chieshënquin abi cuidquidquio Nuquin Papambo chushcabededposh.

¹⁰ Adnubien utsintsen ambi bedboed maspanëmpin cushtoaid chiuimbenequin acte uquëducuësh choboed chuiquid dapa icsamboshë icquid ambi namiaidobëd tabadacno chiuimbeneposh. Adoaquien inchëshposh inchëshquio yec. Badiadenquio icposh. Adsho isash matses abitedi natiambo dacuëdcuededposh.

¹¹ Adec dacuëdcuededec: —Ambi chiaid niac-niacsho Nuquin Papan nuqui cuideque. Nuqui icsaid ënash ambi chiacpadec tabadnuna — quetiadquidëmbi: —Natiambo chiuëmianec Nuquin Papa icsambo iquec —qeshun Nuquin Papa chushcabededposh.

12 Adnubien utsintsen ambi bedboed maspanëmpin cushtoid acte dapa Eupëdates caid nëchiuimposh. Adoaquien Eupëdates caid acte nua icboedi nibëdquio yec uesadposh. Ma matses utsi-utsiec aton chuiquid dapabobëdi tsidadash Esus chedo cuesun secanuec ushë choacmiuësh choquin ma potenuequin aden acte uesadmeposh.

13 Adec aid matses cho-choabi icnuc ushë choacmishun cho-chometequidëmpi naden ismeposhi. Coqueshbimboecquid podobitsi icsa 3tedi ana shëcuënuësh cho-chosho ispombi. Nëidic nisi dapabimboecquid Satanasën ana shëcuënuësh choquid. Nëidic acte uquëducuësh choboed chuiquid dapa icsamboshë icquidën ana shëcuënuësh choquid. Nëidic nidaid shëcuënuësh choboedën Satanasën muauamequin oncameboedën ana shëcuënuësh choquid. Aidtedi chosho isombi.

14 Satanasën yuabo icquin comapenen tantiaquin nacnenquido niosh. Matses utsi-utsien abi chuiquid dapabobëdtabi namenuc niosh. — Aidon namiac chuiquid dapabo abitedi aton yuabobëdi tsidadash ushë choacmiuëshquio chochoendac. Nuquin Papa chieshënquin Esus chedo cuesun secanuec adec chochoendac. Nuquin Papan tantiacpadënquiobi adendac —camenuen mayan bëdan aden ismeposhi.

15 Adnubien Esusquio cuëdposh. —Tantia. Chuinu. Mimbi: “Nëbimbobi aid choec,” cacmaidquieni choendac. Ushenquio yacbimboen ëbi ënenquio icquin tantiec: “Nëbien Esus chochitec. Choshon nuqui icsaid abitedi

chuiquin cuidnushe. Bëdamboec tabadnuna,” quec bëdamboec tabadta. “Nëbi nidnu. Nid,” cac: “Ai, con na ënden nacnenombique. Baded nid,” quiac bimboec icta ëbi cainec –queposh Esus.

¹⁶ Adnubimbi coquesh bimboec quid podobitsi icsabon namiac matses utsibo chuiquid dapabo abitedi aton sondadochedobëdi cho-chosho ispoc. Nidaid Isadaid caid yacno macuësh icsho isadaidbon onqueten Admaquedon caid yacno cho-choposh Esus chedo cuesun secanuec.

¹⁷ Adnubien maspanëmpi bedboed utsintsen ambembi chiuinquin Nuquin Papan cuidte ënquimbi ismeposh. Ambembi chiuinubien abi tabadacnuëshquio Nuquin Papa cuëdposh. –Padi. Nëbi ëmbi tantiacpadomboen ënquimbi cuidec –queposh.

¹⁸ Adnubien abu bed-bedquetanepamboec abu tesquianenuc natiamboshë shëc-shëcquemboec nidaid uëdë-uëdëquiamposh. Nuquin Papan tauamboen matses uambi adec nidaid uëdëquiambo. Bëdiactsëc nidaid uëdëquedenedi acquimboec uëdëquiamposh.

¹⁹ Adnubien matses dadpen yacno Babidonia caid yacnuësh nidaid abichobi icboedi 3tedi yanec tiadbudneposh. Aden Nuquin Papan: –Anocquido icsamboshë icquido nec –quequin Babidonia caid yacnocquido uesquin cuidquioposh. Adec nidaid uëdëquenubi nidaid utsi-utsiec yacno shubu dadpen icquid yacno-yacnomboec shubu abitedi uesadec chimeshadbudneposh.

²⁰ Nidaid uëdëquenubi chian dapa mad caid yacno acte nënantan nidaid icquid abitedimbo

nibëdambudneposh. Adecbidi macuësh abitedi
nibëdambudneposh.

²¹ Abucuëshquio ue dapa choacbimboec ue
tsasi nuacquid dapa quidos 50 icnuc yuë
tanaid dadpenquio paëdbudnequimbi matses
tish-tishbudneposh. Aden ue tsasi dapan
mëyansho isun padenquio ictiadquidëmbi
matsesën Nuquin Papa chushcabededposh.
—Nuqui icsaid ënshun Esus tantianuna —
quetiadquidëmbi chushcabededposh. —Adquido
iquendac —quequin ushquin isacbimboecnuc
aden ismeposhi.

17

Chido chishpidabimboecquid ismiaid

¹ Adshumbic maspanëmpin icquid chiuim-
boedën abentsëcshun chuiuamposhi. —Isec cho.
Mimbi isboed Babidonia caid yacnocquido cuidte
mibi ismenu. “Babidonia caid yacnocquido
matses utsibo dadpenquio icsamete bunquido
nec,” quequin chido chishpidabimboecquid acte
dapa bëntse tsadsho mibi ismenu. “Adquid icsho
Nuquin Papan cuidquiendac,” quequin mibi
ismenu.

² Aido icsamboshë iquec. Matses utsi-utsien
abi chuiquid dapabobëdta uisma uanten danosh-
cacbimboen Nuquin Papambo tantiamenquio ic-
quin ambi chiaid niac-niacmequioposh. Aido
cuidsho isec cho —queposh.

³ Adshumbic ushquin isacbimboecnuc isme-
poshi. Nuquin Papan Mayanën tantiamiac ma-
siuidquio yacno shubu nibëdacnombo chido aben

icquid dapa catsadsho ispombi. Aben icquid pi-umboshë icposh. Aidën dadan: —Nuquin Papa caid nibëdquio iquec —quequin uesquin dada uapaidquio icposh. Aton mapi sietetedi icnuc aton pais 10tedi icposh. —Mimbi isboed acte uquëducuësh choboed chuiquid icsamboshë icquidquio nec —quequin aden aben icquid ismeposhi.

⁴ Aid catsadquid chido dashcute piumbo icquidbëd umumbo icquid dasiuidposh. Shocosh piu nacnenaid chedo cuënotempi nac-nacquio icquid chedo payuec aighbidi mësiuidposh. Dëshote bëdambo icquid sanamposh. Aden sanansho dëshote anisquin isaquien icsambo icquiduidquio icposh. —Chido chishpidabimboec Babidonia caid yacnocquido icsamboshë iquec. Uisma uanten danoshcachimboen: “Nuquin Papa caid nibëdquiec,” quequin tantiamequin matses utsibo dadpenquio icsamequiendac —camenuen aden ismeposhi.

⁵ Adshun isquien aid chido abi tantiamete abi cuëmëdquid bëtanteteno bëdada uadac. —Babidonia yacnocquido bëdambo icquido damianquidi icsamboen tabadmequido nec —quequin dada uaid icposh.

⁶ Aid chido paëmbo icquid acacchimboec Esus tantiaquidon intac acash tantiadenuio yamposh. —Babidonia caid yacnocquidon Esus tantiaquido dadpen cuesun secaindac —quequin tantiamenuen aden ismeposhi. Dacuëdampamboecsho isash: —¿Mitsipadquiopequini ique? —quebudquiobi.

⁷ Adbudquioshobini aid mayan bëdan: —

“Tantiadenquoio iquec,” ¿quecta ique? Tantia. Chido chishpidabèdta abi catsadaid aben icquid chuinu.

⁸ Mimbi isboed aben icquid icsamboshë icquid ictenedi nèbi nibèdec. Yuecshun Satanasèn abi tabadacnoshon padpiden chomendac. Adoacsho yuecshun Nuquin Papan chian anèdënquiacno nèsecaindac. Aden cuidabi Satanasèn chomebocsho isun Nuquin Papa tantiesabon: “Comapenen tantiaquidien nechitec. Matses nibèdanèdai uincuenashien choachitosh. Aidi tantianu,” caindac. Matses uabi icquin Nuquin Papan: “Èbi tantiaquido iquendac,” cacmaidonquoio adoendac —queposh mayan bèda.

⁹ Adshumbic padpiden chuiposhi. —Tantia. Èmbi chuiboed bèdamboen tantiamenuen chuinu. Naden tantiamenuen aben icquidèn mapi 7tedi icquid mibi ismiombi. “Babidonia caid yacno matses icsa uaquido tabadacno macuësh dapa 7tedi iquec,” quequin tantiamequimbi: “Chuiquid dapabo 7tedbidi iquendac,” camenuen aid mapi 7tedi mibi ismiombi.

¹⁰ Aid chuiquid dapabo 5tedi nibèdnubi utsi abi iquec. Nèbi aidèn aton matses namec. Utsitsen choendac. Choshon aton matses nametantsequi badedquoio nibèdanendac.

¹¹ Nibèdanèdai choashic èmbi ismeboed acte uquèducuësh choaed chuiquid dapa icsamboshë icquidquoio iquendac. Aidèn èmbi chuiboedo chuiquid dapabo 7tedishun namiacbimboen aton matses icsamboenshë namendac. Adoacsho isun Nuquin Papan icsaido cuidquiacno nèsecaindac —queposh mayan bèda.

¹² Adashic abi onquec: —Naden tantiamenuen

aben icquidèn pais 10tedi icquid mibi ismiombi. Chuiquid dapa utsibo 10tedi iquendac. Nèbi aton matses namiabi iquec. Padabi. Adquido yanendac. Satanasèn acte yacnuèsh choboedbèdta chuiquid dapabo icmiac matses icsamboenshè namiash yuec tabadabi badedquio nibèdanendac.

¹³ Nibèdanabi icquin aidon acte uquèducuèsh choboed abi chuiquid dapambo icmendac. “Aidèn namiac abi tantiaquidobèdta Esus nuquitedishun cuesun secatsiac nibèdquio icnuc,” queshun aden icsamboshè icquid abi chuiquid dapa icmendac.

¹⁴ Aden Esus chieshènquidon: “Chieshtomenu,” cac Esusèn yuaido abi tantiaquidotedi chieshtoenquio iquendac. Aton Icbo Esusèn abided cuidadec unèsaidèn namiac chieshtoenquio iquendac. Aden abi tantiaquidobèdta chieshènquin cuesun secanuec cho-chocho isun Esusèmbi cuesun secaindac. “Èbien matsesèn Icbombo nec,” quetanquin adoendac –queposh mayan bèda.

¹⁵ Adashic padpidec: –“Nidaid utsi-utsiec yacno tabadquido dadpenquio Babidonia caid yacnocquidon icsamendac,” quequin tantiamenuen chido chishpidabimboecquid acte dapa bèntse tsadsho mibi ismiombi.

¹⁶ Aden Babidonia caid yacnocquidon nasho isun mimbi isboed chuiquid dapa icsamboshè icquidèn abèdtan chuiquid 10tedi icquidbèdtan Babidonia caid yacnocquido chieshènendac. Aden chieshènquin cuesun secatanquin shububèdtabi nèdèncaindac nibèdquiecnuc.

¹⁷ “Ma Babidonia caid yacnocquido uesquin cuidnu,” quequin ambi tantiacpadomboen Nuquin Papan aden acte uquèducuèsh choboed

chedo chuiquid dapabo icmendac.

¹⁸ “Matses utsi-utsien chuiquid dapabo aton matsesbèdtabi yuaquid abi iquec,” quequin mibi chido chishpidabimboecquid nèbi ismiombi — quequin mayan bédan chuiposhi.

18

Nuquin Papan Babidonia caid yacnocquido cuidaid

¹ Aden Babidonia yacnocquido cuidte chuisho tantiaboshombic mayan bèda utsi Nuquin Papa yacnuèsh abucuèsh budsho ispombi. Nuquin Papan icmiacpadquid mayan bédabo chuiquid dapa yec bëchamuanquiecposh.

² Choshombic nua cuèdquin chuiposh. —Babidonia caid yacnocquido Nuquin Papan uesquin cuidquiendac. Aden cuidac matses nibèdquiecnuc abi tabadtenecnombo podobitsiuidpambo tabadendac. Ambobidi edesteuidquio tabadendac.

³ Babidonia caid yacnocquidon matses utsibo abitedimbo abi chuiquid dapabobèdta Nuquin Papa tantiamenquio icquin icsamequioposh. Adembidi abi bunaid bednuen matses utsibo piucquid dadpen menedenequin Nuquin Papa tantiamenquio icposh. Adsho Nuquin Papan cuidquiendac —quequin mayan bédabon chuiposhi.

⁴ Adnubien Nuquin Papa abucuèsh onqueposh. —Tantia, Esus tantiaquido. Mibitsen chuinu. Babidonia caid yacnocquidon nacpadomboen nainda. “Aidobèdi icsasho èbitsen cuidquionoshe,”

qeshun aidon namiacpadomboen nainda. Auëshquio niqueta —qesho tantiombi.

⁵ Nuquin Papa yacnoshombidi utsin chuiposh. —Ènèdenquio yec icsauidequi icscho isun ambi tantiacpadomboen Nuquin Papan cuidquiendac.

⁶ Babidonia caid yacnocquidon matses utsibo dadpenquio icsamequioposh. Aden icsamequido icscho Nuquin Papan nēbi nēishquioshon uesquin cuidquiopashun —queposh mayan bēda.

⁷ Adashic abi onquec: —Babidonia caid yacnocquido cuidtequido nec. Ambi naiduidi naquin aton na dadpenquio bedash: “Aidtedi dayun uaic bēdambo iquebi,” quepec Nuquin Papan cuidte tantienquio yequi. Adsho tantiashun: “Natiambo icnuc comapenen cuidquiopashun,” caimbi. Otacquio tantiec: “Nuquin matses yuabo dadpen icnuc nuqui bēdamboec tabadec. Chido niante bēnē unēsaid mēyadac bimboec mēyadtiapimbo nuqui iquendac,” quechitequien iquec Babidonia caid yacnocquido Nuquin Papa tantiatiapimbo yec.

⁸ Adsho ambi: “Nēbi ēbi cuidec,” cacmaidēnquio cuidendac. Nuquin Papanquio abitedishun Icbombo icquin comapenen tantiaquin nacnenquidquio icquin badedquio cuidquiendac. Aden dadpenquio unēs uabudniacsho isash natiambo sedenquecuededendac. Aton pete nibēdquiecnuc natia bunendac. Aton shububēdi dadpenquio nēdēnquendac —queposh mayan bēda.

⁹ Adashic abi onquec: —Adec Babidonia yacnuësh nēdēnquec pushudtonesho isash: “Aidon namiacpadomboen Nuquin Papa tantienquio icquin con na dadpen bedtenembi,” quequin chuiq-

uid dapabon nadambocain sedencabededendac.

¹⁰ “Tantia. Nuqui tantiaido sidquebudneque,” quec uinte paëdtampamboec dacuëdtanash uanoshon isec tabadendac. Adec tabadec: “Aido unësquimboshë iquec. Aton matses aton yuabobëdi dadpenquoio icpadenec. Ambi dayun uaid dadpenquoio icpadenec. Matses utsibo dadpen namepadenec. Aido tantiac unësquimboshë iquec. Badedquoio uesquin cuidquiopac,” quec sedenquecuededendac Babidonia caid yacnocquido tantiec –queposh mayan bëda.

¹¹ Adashic abi onquec: –Babidonia caid yacnocquido aden cuidacsho isash utsibotsen: “Ëmbi meniaid bedshun piucquid dadpen menedenebi. Nëbi adquid nibëdquiec. ¿Tsuntsimbini ëmbi meniaid cuidquin piucquid menepatsiashba?” quec sedenquecuededendac.

¹² Aidobidi: “Nadquid Babidonia caid yacnocquido menequin piucquid dadpen bedtenembi. Nëidic shocosh piü. Nëidic shocoshquoio. Nëidic casëdubimboecquid cuënote bëdambo icquid. Nëidic dashcute bëdambo icquid. Nëidic dashcute piumbo icquid. Nëidic dashcute umumbo icquid. Nëidic sëntebimboecquid nacnenaïd. Nëidic aben icquid edepanten shëta nacnenaïd. Nëidic cuëte utsi bëdaïdquoio nacnenaïd. Nëidic shocosh utsi nacnenaïd. Nëidic cuënote nac-nacquoio icquid nacnenaïd. Piucquid dadpen menequin adquidtedi Babidonia caid yacnocquidon bedpadenec.

¹³ Utsitsen dadpen bedpadenec. Nëidic batambo icquid sabimboecquid. Nëidic bëdambo nuadte. Nëidic bëdambo nuadec danoshquete. Nëidic acte paëmbo icquid. Nëidic bëchi. Nëidic pan nac-

nentequid. Nèidic nèish yua baca caid. Nèidic nèish yua utsi obeca caid. Nèidic nèish yua cabayo caid. Nèidic matses antsadsho cabayon nimbanquin buante. Nèidic ambi chonoa uatequido matses ambi ampequin bedaido dadpen. Babidonia caid yacnocquidon aitedi dadpenquio bedtenesho aton piucquid dadpen bedpadenembi,” quependac nidaid utsi-utsiec yacno tabadquido — queposh mayan bèda.

¹⁴ Adashic abi onquec: —Abi piucquid menedenedèn dayun uaid nibèdanesho isash: “Aid matses bunaidquio ambi dayun uaid pete nibèdquiec. Ambì dayun uaid dashcute bèdambo icquidbèd aton na utsi dadpen abitedi nibèdquiec,”

¹⁵ quiash natiambo dacuèdec uanoshon isec tabadec sedenquecuededendac abi piucquid menedenedo tantiec.

¹⁶ “Aid matses tantiac unèsquimboshè iquec. Matses dadpen yuaquin matses dadpen namepadenec. Aton matses dashcute bèdambo icquid dasiuidcuededtenec. Utsi-utsiec dashcute piumbo icquid dasiuidnubi utsi-utsiec dashcute umumbo icquid dasiuidcuededtenec. Utsimbic casèdubimboecquid shocosh piu nacnenaid payudenec. Utsibic casèdubimboecquid utsi payuec mèsiuidtenec. Adec: ‘Con na dadpenquio icnuc bèdamboec tabadebi,’ quepadenec Babidonia caid yacnocquido.

¹⁷ Adsho isun Nuquin Papan abi ushèmbi cuidquiac ambi dayun uaidbèd aid matses badedquio nibèdanac,” quec sedenquecuededendac abi piucquid menedenedo tantiec. Adecbidi nidaid utsin icquidotsen sedenquecuededendac.

Nëidic cano dapa dancha icbo. Nëidic dancha icbobëd nidquido aton yuabo. Nëidic icbo piucquid meniash dancha antabëdtoquido. Nëidic nuëcquid bedshun piucquid bednuen menequido. Aidedi uanoshon isec sedenquecuededendac.

¹⁸ Nëdënquec pushudtonesho uanoshon isash: “Adquido utsi nibëdec,”

¹⁹ quiash natiaquiec sedenquecuededendac. Adec shubiec: “Ëbipadquid dancha icbon bëaidtedi bedshun piucquid dadpen menedenedo tantiac unësquimboshë iquec. Is. Cuidquiac badedquio nibëdanaque,” quec sedenquecuededendac — queposh mayan bëda.

²⁰ Adashic mayan bëdabidi: —Ëbien cuishonquendac. “Nuquin Papa yacno tabadquidotsen ëbëdi cuishonque,” quequin chiendambi. Esus tantiaquido chuiquinc Esusbëd icquidombo chuiquinc Nuquin Papan chiaid chuibanquido chuiquinc caquin: “Cuishonquec tabadnuna. Mibi chieshënquin natiamiacpadomboen mibi chieshënquido Nuquin Papan uesquin cuidquioshe,” quequin chiendambi — queposh mayan bëda.

²¹ Adnubien mayan bëda utsin uidënquio icquidënquio nidaid moco nuacquid dapa yuëmboshë icquid cadotanquin acquimboen acte nënebidanquimbi chuiposh. —Ëmbi acquimboen nënebocpadomboen Nuquin Papan Babidonia caid yacnocquido uesquin cuidquiendac nibëdquiecnuc.

²² Adoac aido ictenecnombo nadimbo iquendac. Ten-tencate ten-tencainquio iquendac. Utsibo-

bic cuèdënenquo iquendac. Utsibombic shoncate shoncainquo iquendac. Cuète chëshun nacnenenquo iquendac. Piacbo macuesenquo iquendac. Nadimboshë iquendac.

²³ Tabote taboadaid nibëdendac. Dada aton chido ambi nëbi bedaïdbëdi mamënenquo iquendac. Nibëdec. Nadimboshë iquendac. Adsho isash utsibo: “Babidonia caid yacnocquidon aton piucquid bednuen comapenen tantiaquin ambi naiduidi napadenec. Aden naquin ambi icsamboen tantiaid matses utsibo abitedi adembidi tantiamequin icsamepadenec,” quendac.

²⁴ Nuquin Papan cuidabi icnuc aden icsamequin Babidonia caid yacnocquidon Nuquin Papa chieshënquin ambi chiaid chuibanquidobëdtabi Esus tantiaquido dadpen cuesun secaindac. Adsho isun aidon yuaido matses utsibon adembidi Esus tantiaquido cuesun secaindac. Adsho isun Nuquin Papan uesquin cuidquiendac —queposh mayan bëda.

19

Chieshënquido cuidacsho isash cuishonquiaid

¹ Aden mayan bëdan Nuquin Papan Babidonia caid yacnocquido cuidte chuisho tantiombi. Adshun tantiaquien Nuquin Papa yacnuëshquo Esus tantiaquido dadpenquioshë comapenec cuèdëncuededposh.

—Nuquin Papa bëdamboshë iquec.

Aiduidtsëqui matses abitedishun Icbombo nec.

Aton Mado abided ciudadec unësaid tantiasho matses bëdamboen isec.

² Muesambo icquin ambi chiacpadomboen
naquidquio nec.

Abi tantiesabo ënëdenquio yec icsauidequi icsho
cuidquidquio nec.

Adquid icquin: “Icsamboshë iquec,” quequin mat-
ses utsibo icsamequido Babidonia caid yac-
nocquido cuidquioposh.

Nuquipadquid Esus tantiaquido cuesun secacsho
isun cuidquioposh

—quec cuëdëncuededposh.

³ Adashic padpidemboec:

—Nuquin Papa bëdamboshë iquec.

Is. Pushud-pushudpambo icnuc nëdëncquin
Babidonia caid yacnocquido uesquin
cuidquioshe

—quec cuëdëncuededposh Esus tantiaquido dad-
penquioshë.

⁴ Adsho tantiash Nuquin Papa chuiquid dapan
tsadten tsadnuc abi dacuenadec tabadquido:

—Nuquin Papa Nuquin Icho nec —quequin
ismenuc danëshën tinquebudcuededposh.

Adec tinquebudcuededequi: —Abimbo caic.
Nuquin Papa bëdambo iquec —quecuededposh
dadanobi ëshëcquido 4tedi icquido tsusiobo 24tedi
icquidobëdi.

⁵ Adashic auëshquiobidi abentsëc cuëdposh.

—Nuquin Papa matses uaquidquio yec
bëdamboshë iquec, canuna.

Nuquibi abi tantiaquidtedishun: “Nuquin Papa
bëdamboshë iquec,” canuna.

Aton yuabo icquin nuquitedishun adonona.

Chuiquid dapabo aton yuabobëd icquimbi nuquitedishun: “Nuquin Papa bëdambo iquec,” canuna —queposh.

Esusën abi tantiaquido beduante chiaid

⁶ Adsho tantiash abu tesquianiacbimboec actenua chododoquiacbimboec Nuquin Papa yacnoquido dadpenquo cuëdëncuededposh.

—Abi chieshëncuquidon Nuquin Papa dëniactiapimbo iquendac.

Ambentsëqui abitedimbo namendac.

Nuquin Papa bëdamboshë iquec.

⁷ Nuquin Papa tantiec cuishonquenuna. Nuquin Papa bëdamboshë iquec.

Dadan aton chido buntacquo beduanacbimboen abided ciudadec unësaid Esusën abi tantiaquido beduanshun abi yacno tabadmendac.

Bënën beduanabi yac chido: “Con bënën nëbi beduanebi,” quiash nacnemëdquiacbimboec:

“Nëbien con Icbo chochitec,”

quiash Esus tantiaquido bëdamboec tabadec.

⁸ Abi tantiasho Nuquin Papan bëdamboen isaido yec abi icsaid ënash:

“Nëen con Icbo chochitec,” quiash bëdamboec tabadec.

Aden abi tantiasho Esusën dashcute chuca ushumbo icquid dasiuinacbimboen abitedi icsaisa icmendac

—quec comapenec cuëdëncuededposh.

⁹ Adnubi mayan bëdan chuioaposhi. —Ëmbi chuibocpadomboen dada uata. “Ësadaidbo aton chido bedquin aton matses cho-chomiash pemec

bëdamboec tabadquid. Adembidi abi tantiaquido Esusën: ‘Cho,’ cac abi yacno nidaniash cuis-honquequiec tabadendac,” quequin dada uata. Abimbo caimbi. Nuquin Papan chiaidquio chiec nebi –queposh mayan bëda.

¹⁰ Adsho tantiashini Nuquin Icbo danec ismenuc danëshën tinqebuduidpoc. Adshobini: –Ëbi aden ismenda. Nuquin Papauidtsëqui aden ismeta. Mibipadquid Nuquin Papan yuabidi nebique. Nuquin Papan Mayanën Esus tantiamequin Nuquin Papan chiaid dada uamepampic. Aidëmbidi namiac mibipadquidobëd Esusën yua nebique. Ëbi aden ismenda –queposh mayan bëda.

Cabayo ushu catsadquid bëdamboshë icquid

¹¹ Adshumbic abuc isquin Nuquin Papa yacno shëcnepamboacsho ispombi. Adshun isquien auëshquio cabayo ushumbo icquid catsadec chuiquid dapambo choposh. Adsho isun: – Abi tantiaquidobëd cuëshëdtiapimbo icquid yec ambi chiacpadomboen naquidquio Esusquio nec –quequin tantiombi. Ambi chiacpadomboen icsaido cuidquidquio icquin icsaido cuesun secanuec niosh.

¹² –Matsesën ompodëmëdtiapimbo icquidquio nec –camenuc cuëte isquidquio icquidbimboec ëshë icposh. –Abitedimbo chuiquid dapambo nebi –quec mauete dadpen maueposh. Abi cuëmëdquid abi bëdada uadaid tantiadenquio icposh. Utsibon tantiatiapimbo icnuc ambentsëqui tantiate niosh. –Nuquin Papabëdtan Esusën

naidtedimbo matsesën tantiatiapimbo iquec — camenuen adec bēdada uadaid ismeposhi.

¹³ Abi cuēmēdquid utsiembi tantiatsēccoc. — Nuquin Papapadquidquio yec abi tantiamianquid nec — quequin cuēnaid niosh. Aton dashcute bēntse icquid cuidaidēn intaquēn punacbimboec piumboshē isadposh. — Abi tantiesabo cuidquidquio nec — camenuen aden ismeposhi.

¹⁴ Esus bēyuc nidnuc abi tsibanec abi tantiaquidobēd mayan bēdabo cabayo ushucquiduidquio catsadcuededec cho-choposh. Icsaisa icmiaido yec dashcute ushumbo icquid bēchish nibēdquidquio dasiuidcuededposh.

¹⁵ Abi bēyucquid ana shēcuēnuēshquio chēshte cuēnumbo icquid cueshqueposh. — Ambi chiacpadomboen matses icsaido abitedi cuidquidquio Esus nec — camenuen aden ismeposhi. Adquid icquin nidaid utsi-utsiec yacno tabadquido icsauid-equi icsho uesquin cuesun secaindac. Nuquin Papan chiacpadomboen naquin shancuinbimboecquid uba caid nua ēnē icnuc tish-tishacbimboen nua intac icnuc cuesun secaindac.

¹⁶ Aton dashcute bēntse icquidēn abi cuēmēdquid utsi dada uaccosh. — Abipadquid utsi nibēdnuc abitedimbo chuiquid dapambo yec abitedishun Icbombo nec — quequin dada uaccosh. Aton bēusudquid yacnombo adembidi dada uaccosh.

¹⁷ Adnubien ushē mēducquio tabadquin mayan bēda utsin edeste chedo abuc cuen-cuensho comapenec cuēdquin chuiposh. — Nuquin Papan cuidquin cuesun secaidon nami chec cho-cho.

¹⁸ Ēmbi chiacpadec cho-choshon matsesën nami mimbi nua tēpuisquin chendac nēidtedi. Nēidic mat-

ses utsi-utsien chuiquid dapabo. Nëidic sondado chuiquid dapabo. Nëidic dada cuesabo. Nëidic cabayo chedo abi catsadquidobëdtabi. Nëidic matses utsibo abitedimbo. Nëidic matses yuabo. Nëidic matses yuapenquio. Nëidic bacuëbo. Nëidic caniaido abitedi. Adquidtedi uesquin chec cho —quequin edeste chedo chuiposh. —Ambi tantiacpadomboen Nuquin Papan matses uesquin cuidquiendac —quequin aden ismeposhi.

¹⁹ Adshumbic mayan bëdan ismeboedo Esus chedo cuesun secanuec cho-chosho ispombi. Acte uquëducuësh choboed chuiquid dapa icsamboshë icquid chedo nidaid utsi-utsiec yacno tabadquido abi chuiquid dapa chedobëdi tsidadash chochoposh coqueshbimboecquid podobitsi icsabon namiacpadec. —Cabayo ushumbo icquid catsadquid Esusquio abi tsibanquidobëdta cuesun secanu —caqui

²⁰ cuesun secadenquio icposh. Adshobien Esusën acte uquëducuësh choboed chuiquid dapa icsamboshë icquid bedposh. Adotanquimbic aid tantiamequid nidaid shëcuënuësh choboed Satanasën oncamiaidtsen bedposh. Aid comapenen tantiaquin ismequin muaquin abi chuiquid dapan icsamboshë icquidën chiacpadomboen matses namequidquio niosh. Adec muaquin abi chuiquid dapabimboecnuc nacnemequidtsen niosh. Adecbidi: —Ëbi chuiquidën yuabo nec —quequin matses dadpen bësiadmequid niosh. Adec icsamianquidquio icsho bedposh. Abi chuiquid dapabëdta bedshun unës uabi chian dapa ënëdenquio yec anëdënquequid icsamboshë nuadquidquio nësecaposh.

21 Adshumbic Esusën ana shëcuënuësh chështe cuënumbo icquid cueshquequidën: — Ëbi chieshënquidotedi unësta —caquien chochoboed utsibo abitedi unësbudneposh. Adsho isun caimboedon edeste chedon nua-nuaic tēpuisquin matsesën nami chebededposh. —Aden Esusën abi chieshënquido nibëdamendac —camenuen aden ismeposhi.

20

Satanas uidën uaid

¹ Adshumbic padpiden ismeoaposhi. Adoac mayan bëda utsi Nuquin Papa tabadacnuësh budsho ispombi. Podobitsi icsabo Satanasën yuabo shëcuën tabadacno bëtashaid chictëbëdta shocosh bucubimboecnuc nacnenaid dapa sanamposh.

² Adshumbic Eba icsamenuec nisipampid Satanasquio bedposh. Bedtanquimbic shocosh bucubimboecnuc nacnenaidën ambi sanamboedën uidën uaposh.

³ Uidën uatanquimbic aton yuabo uidën uacno shëcuë aneposh. Adotanquimbic shëcuë bëtashquioposh pduentiapimbo icnuc. Seta dadpenquio 1000tedi matameshun bëtashte chicshun Satanas cuemenuen adoposh. — Aden seta 1000tedi matamiabi icquin abi uidën uactedembi matses muauaquin icsametiapimbo iquec —qeshun chicten bidiacquin uidën uaquioposh. Aden ismeposhi.

⁴ Adshumbic utsitsen ismeoaposhi. Adoac chuiquidën tsadten icbo-icboec chuiquid dapabo tabadsho ispombi. Esus tantiaquido neposh. Aido Nuquin Papan icmiacpadquid abimbo

chuiquido icquin Esusbèdtambi matsesèn naid abimbo chuibamposh. Aden matses bédamboen nameposh. Satanas uidèn uacpadembi seta 1000tedi matamequin adoposh. Aido utsi-utsien mapi butiaido uincuemiaido neposh. Aido Esus tantiaquin acte uquëducuësh choboed chuiquid dapabèdta abibimboecnuc nacnenaid tantiapimbo icquido neposh. Adecbidi: –Aidèn yua nebi –quec aid chuiquid icsamboshë icquid cuëmédquid dada uadec bësiadtiapimbo icquido niosh. Utsibic mësiadtiapimbo icquido niosh. Adquido icsho icsamboshë icquidon cuesun secaido niosh. Aido Nuquin Papan uincuemiad tabadposh.

⁵ Unësaidotedi uincuemiambo icposh. Nuquin Papan ambi tantiactedi tauaquin uincuemeposh. –Seta 1000tedi matameshun utsibo abitedi uincuemendambi –quequin adoposh.

⁶ Adnubien tauaquin uincuemiaido bédambo yec cuishonqueposh: –Padpidec unëstiapimbo iquebi –quiash. –Adquid icquin Nuquin Papan yuabo yec: “ ‘Esusbéd Nuquin Papa bédamboshë iquec,’ canuna,” quequin chianequid nendac. Aid seta 1000tedi matamequin Esusbèdtambi utsibo bédamboen namequid nendac –quequin aden is-meposhi.

Satanasquio chian anëdënquequid nëniaid

⁷ Adshumbic aidtedquio seta 1000tedi matameshun uidèn uaid chicquin Satanas cuemendac.

⁸ Adoaquien matses icsamenuec muaquin chiec nidaid utsi-utsiec yacno nidendac. Aden aidèn muaquin namiaquien matses dadpenquio Esus

chedo cuesun sianuec tsidadendac. Nèidic nidaid Coc caid yacnocquido. Nèidic nidaid utsi Macoc caid yacnocquido. Nèidic matses utsibo abitedi cuëte podotedi dadpenquioshë.

⁹ Aidedi tsidadash cho-choash Esus tantiaquido tabadacnombo Nuquin Papan tantiacnobi Edusaden yacno daquiadshun cuesun secatiadpambo iquendac. Adshobien Nuquin Papan nédënquepamboecquid budmequin uesquin pichicaindac.

¹⁰ Adshumbic aido icsa uamequidtsen Satanasquio bedshun acte uquëducuësh chondaid chuiquid icsamboshë icquidbëdta nidaid shëcuënuësh chondaid ënden nësecaondacnombo chian anédënquequid Satanastsen nënendac. Adoac aido ënëdenquio yec natiamboshë iquendac. Aden ismeposhi.

Icsambo icquido cuidte chiaid

¹¹ Adshumbic padpiden Nuquin Papan matses cuidte ismeposhi. Adoac tsadte nuacquid dapan ushumboshë icquidën Nuquin Papa tsadsho ispombi. –Icsaisambo icquin matsesën naidtedi chuibanquin Nuquin Papan icsambo icquido cuidendac –camenuec adec tsadposh. Icsambo icquido cuidquidquio yec dacuëdampamboecshë Nuquin Papa isadnuc abubëdi nidaid abichobi nibëdanaccosh padpidec isadtiapimbo yec.

¹² Nuquin Papa yacno unësaïdo uincuemiaïdo abitedimbo tabadposh. Adnubien bëshunenquio icquin dada uaten dada uabanacbimboen Nuquin Papan abitedi tantiaquid icquin matsesën naidtedi abimbo chuibamposh cuidnumbi. Abi

tantiaquido abèdi tabadmequimbi abi tantiesabo comapenen cuidnun aden chuibamposh.

¹³ Unèsaido abitedi icposh. Utsi-utsiec unèsacsho chian dapa mad caid nēniaido uincuemiaido niosh. Utsi-utsiec nidaidēn chococaid uincuemiaido niosh. Adsho aidon naidtedi Nuquin Papan chuibamposh.

¹⁴⁻¹⁵ Adshumbic Esus tantiesabo icsho documento nibēdquidbimboecsho abi yacno tabadmenquo icquin chian dapa anēdēnquequid uesquin nēsecabamposh. Aden Esus tantiesabo nēsecan unēstequido utsibo nibēdposh. Esus tantiesabo aton dada unēsān abi tantiate tabadacno utsibo tabadenquo icposh. Adnubien Esus tantiaquido Nuquin Papa yacno tabadec unēstiapimbo icquiduidquo icposh. —Adquid iquendac — quequin aden ismeposhi.

21

Nuquin Papabēd tabadaidquo

¹ —Esus tantiesabo chian anēdēnquequid nēsecaindac —quequin ismeboshombic padpiden ismeoaposhi. Adoac abu chucambo icsho ispombi. Nidaidtsen chucambo icposh. Abubēdi nidaid shēni nibēdnuc utsi chucambo icquiduidquo icposh. Ēnden iccondaid chian dapa mad caidtsen nibēdposh.

² Adnubien Esusbēdi Nuquin Papa tabadaidquo abichobi Edusaden chuca caid abucuēsh budposh. Chido nēbi bedboedēn aton bēnē cuishoncamiacbimboec cuishoncamianquid yec bēdamboshē icposh.

³ Adnubien Nuquin Papa tsadacnuëshquio comapenec cuëdposh naden chiec. —“Con matses nec,” quiash nëbi Nuquin Papa matsesbëdi tabadendac cuëshëdenquio yec. Adsho isun aton yuabo icquin matses abitedishun: “Nuquin Icbombo nuqui tantiaidquio nec,” caindac.

⁴ Ambo Nuquin Papan abitedi chuca uacnombo aidbëdi tabadec matses shubitiapimbo iquendac bëun ucachimboec. Nidaid shënin tabadec abitedi unëstequiduidquio icboedi Nuquin Papa yacnuëshien matses unëstiapimbo iquendac. Adecbidi sedenquetiapimbo iquendac. Adecbidi paëmbo ictiapimbo iquendac —queposh Nuquin Papa yacnuësh onquec.

⁵ Adnubien abitedishun Icbombo yec chuiquid dapan tsadten tsadquid onquedoposh. — Aden abitedimbo utsi uaquin chuca uaindambi bëdamboshë icnuc —queposh Nuquin Papa Esusbëdi. Adshumbic ëbi chuiquid. —Ëmbi aden chuibod dada uata. Ëmbi muesambo icquin abimbo chiaid nec —queposh Nuquin Papa Esusbëdi.

⁶ Adashic Nuquin Papa padpidec onquec: — Ëmbi chuiboctedimbo nainquin naindambi utsi-bon: “Padi,” catiapimbo icnuc. Ëndenquimboshë nidaid uabi ictenedi nebi. Nëbi adquid yec nibëdantiapimbo icquid nebi. Adquid yec abitedishun Icbombo icquin ëmbi tauaidtedi nainendambi. Adquid icquin acte bunacimboec ëbëd tabadte bunquidon con Mado Esus tantiasho ëbëdi tabadmendambi.

⁷ Satanasën: “Chieshtomenu,” cauidaido Esusbëdta ëbi chieshtoenquio icquin tantiaquido

ëbëdi tabadmendambi bëdamboshë yacnombo. Èbi papa casho: “Ai, con mado mibi nec. Con champi mibi nec,” caindambi.

⁸ Adshumbic utsibo chian dapa anëdënquequid icsamboshë nuadquid nësecaindambi. Nëidtedi icsamboshë icquido adoendambi. Nëidic ëbi bëdiactsëc tantiauidtsëcboedobi chieshëmënquidon: “Cuesnu,” cac chieshtoash tantiesa yanoaido. Nëidic Esus tantiesabo abitedi. Nëidic icsami-anquido. Nëidic chieshëmë nec cuesunianquido. Nëidic dada aton dada utsibëdi chichudnanquido. Nëidic aton chidopenquio chudquido. Nëidic aton bënëpenquio chudmequido. Nëidic nënëchoquidobëdtabi cuëte podon unës uante bunquido. Nëidic ambi nacnenaidi papa caquin tantiaquido. Nëidic muauanquido. Aidtedi chian dapa anëdënquequid nësecaindambi —queposh Nuquin Papa.

Abi tantiaquido Esusbëd icte chiaid

⁹ Adnubien mayan bëdan Nuquin Papan matses cuidte cushtoaid chiuimboed abentsëc choshon chuioaposhi. —Isec cho. Chido nëbi bedboedën aton bënë cuishoncamiacbimboen abided ciudadec unësaid Esus cuishoncamequido tabadaid mibi ismenu. Cho —caposhi Esus tantiaquido ismenuen.

¹⁰ Adshumbic Nuquin Papan Mayanën tanti-amiac ushquin isacbimboen isombi. Mayan bëdan ëbi buanquin ispombi. Aden buanshun macuësh dapa mananënquio tsadumposhi. Adoac anoshon isquien abucuësh Nuquin Papa abi tantiaquidobëd abi tabadaid abichobi shubu dadpen

icquid budposh. Aid tabadaid Edusaden chuca caposh.

11 Aid tabadaidquio aid shubutedi Nuquin Papa tabadaid yec abi yacpadquio abichobi bēchamauanquiecposh. Casēdu bēdambo icquidbimboec isquid-isquidquio isadposh.

12 Shubu abitedi nēnantan icnuc abichobi daquēnē uaid icposh. Abucquio icnuc daquēnē uaid niosh. Daquēnē uaid puduedte shēcuē 12tedi icposh. Aid shēcuē icbo-icboen isquid yec mayan bēdabo 12tedbidi icposh. Aid shēcuē bētashte 12tedbidi icposh. Aid bētashten Acobon mado cuēmēdquid 12tedbidi dada uabampaccosh naden. Bētashten Acobon mado Ose cuēmēdquid dada uatanquin bētashte utsin Acobon mado utsi Uda cuēmēdquid dada uatanquimbic adenuidi bētashten bētashtenquien Acobon mado cuēmēdquid cuēmēdquidquien dada uabampaccosh.

13 Aid daquēnē uaid puduedte shēcuē ushē choauc 3tedi icposh. Ushē nibēdauc nodte yauc aidtedbidi shēcuē icoaposh. Ushē nibēdaucbidi sud yauc aidtedbidi shēcuē icposh. Ushē budauc aidtedbidi shēcuē icposh.

14 Ambo tauaquin daquēnē uadoquin nidaid cuēnote nuamboshē icquid dapa 12tedi bedshun Esusbēd icquido ēbitedi cuēmēdquid 12tedi aid cuēnote dapan abentse-abentsen dada uabampaccosh naden. Cuēnoten ēbi cuēmēdquid Uan dada uatanquin cuēnote utsin Petedo cuēmēdquid dada uapaccosh. Adenuidi cuēnoten cuēnotenquien Esusbēd icquido cuēmēdquid cuēmēdquidquien dada uabampaccosh. Adoshombic nidaid uēdēshcabanshun tauaquin

sandoshon cuënote utsi tsindoaid aid daquënë uaid niosh. —Esus tishabi icnuc Nuquin Papa tantiapampidobëdi Esus tantiaquido Nuquin Papa yacno Esusbëdi tabadendac —quequin tantiamenuen Acobon mado cuëmëdquidotedi dada uaidbëdta Esusbëd icquido cuëmëdquid dada uaid aden ismeposhi.

¹⁵ Adshumbic ëbi chuiboedën mayan bëdan shocosh bëdaidquio nacnenaid tambante sanamposh. —Nuquin Papa tabadacno tambanquin daquënë uaidbëdtabi puduedte shëcuëtedi tambanten tambanu —queposh.

¹⁶ Adoshombic cuëma abitedi tambanac cuëma tiombi-tiombimboec icposh. Cuëma auc abentsëc tanac quidometedos 2,200ted cactiombi iccosh ënapenquioshë. Aidtionuidi iccosh cuëma abitedi. Adoshombic abuc yacmi cuembotsen tanac aidtionquiobidi icposh.

¹⁷ Nidaid cuënote nuamboshë icquid dapa tsindoquin daquënë uaid bitsipambo icquidtsen tanac nuamboshë bitsi icposh. Matsesën nacnenaid tambanten tanac metedos 65ted cactiombi icposh nuamboshë bitsipambo.

¹⁸ Daquënë uaid abichobi isquid-isquidquio isadposh. Bëdamboshë icposh. Padnuen shubu abitedi shocosh bëshpiu-bëshpiuctsëcquid nacne-naiduidquio yec nac-nacquio icposh.

¹⁹ Aid daquënë uaquin tauaquin sandoaid nidaid cuënote dapa casëdubimboecquid bëdambo icquid matses comapenec bunaidquio utsi-utsien dabitaccabanaid niosh. Abentsëc aspe caid umumumboctsëcquid dabitaccabampaccosh. Utsibic sapido caid umumbo icquid dabitaccabampac-

cosh. Utsibic acata caid ushumbo icquid. Utsibic esmedada caid umumbo icquid utsi.

²⁰ Utsibic onise caid piumbo icquid. Utsibic conadina caid piu-piupactsëcquid. Utsibic quidisodito caid bëshpiu-bëshpiupactsëcquid. Utsibic bedido caid umu-umupactsëcquid utsi. Utsibic topasio caid piu-piupactsëcquid utsi. Utsibic quidisopadasa caid nushan-nushanacbitsecquid. Utsibic asinto caid umumbo icquid utsi. Utsibic amatista caid umumbo icquidbidi. Aidtedi dabitaccabanaccosh. –Nuquin Papa yacnombo bëdamboshë iquendac –camenuen aden ismeposhi.

²¹ Daquënë uaid puduedte shëcuë 12tedi icposh. Aid bëtashtedi acte chiumbimboecquidën casëdu ushu uaid nuacquid dapambo abichobi-abichobien nacnenaïd niosh. Ambo shubu dadpen icquid nënantanquio podqued icposh. Aid podqued shocosh bëshpiu-bëshpiuctsëcquid acte-actectsëcquio icnuc mabiunaïd icposh. – Esusbëd Nuquin Papa tabadacnombo bëdambo icquiduidquio iquendac –camenuen aden ismeposhi.

²² Ambobi abi bëisec tabadacnombo Nuquin Papa tabadte shubu uashunaïd nibëdposh. Ambo Nuquin Icbo Esus abided cuidadec unësaïdbëd Nuquin Papa icsho bëisquioquin tantiec anocquido tabadendac.

²³ Ambobidi inchështanec badiadenquio iquendac. Badiadën ushë isadenquio iquendac. Inchëshën ushëtsen isadenquio iquendac. Nuqui icsaïd bedshunuec abided cuidadec unësaïd Esusbëd Nuquin Papa bëchamuanquieccquid

icquin ambo ushëmbouidi icmendac. Inchëshaid tantiadenuo iquendac. —Nuquin Papa icsaisambo icnuc abi yacno icsaido nibëdquio iquendac —camenuen aden ismeposhi.

²⁴ Icsaisambo icquin Nuquin Papan tantiamiac matses utsi-utsiec abi chuiquid dapabobëdi Esus tantiaquido yanendac. Adash Nuquin Papa yacnombo quenec tabadcuenash: — Esusbëd Nuquin Papa abitedishun Icbombo nec. Abipadquid utsi nibëdec —quendac.

²⁵ Nuquin Papa matsesbëdi tabadacnombo inchëshenuo icnuc: —Icsambo icquido puduednushe. Bëdashnu —quetiapimbo icsho isun daquënë uaid shëcuë bëdashenuo iquendac. Shëcniacchobi iquendac.

²⁶ Padnuen nidaid utsi-utsiec yacno tabadquido chuiquid dapabo Esus tantiaquido yanash Nuquin Papa yacnombo puduedash: — Daëdpactsëc tantiaquin matses daëdpactsëc namebampadenembi. Nuquin Papa aton Mado Esusbëdi comapenen tantiaquidquio yec abitedishun Icbombo nec. Abipadquid utsi nibëdec —quendac abitedi.

²⁷ Ambo icsambo icquid puduedtiapimbo iquendac. Adecbidi omposhon abi bunaiduidi naquidobëd muaquido puduedtiapimbo iquendac. Nuquin Papan bëshunenuo icquin dada uacbimboen: —Icsambo icboedi abided cuidadec unësaid con Mado Esus tantiaquido aido nec. Con bacuëbo nec —capendac. Aden ambi con bacuëbo caido abi yacno puduedendac. —Nuquin Papa yacno adquio bëdamboshëuidquio iquendac —quequin aden ismeposhi mayan bëdan.

22

Nuquin Papa yacno acte ismiaid

¹ Adshumbic aid mayan bēdan padpiden ismeoaposhi. Adoac Nuquin Papa abided cuidadec unēsaid aton Madobēdquio tsadte dapan tabadacnuēsh matses unēstiapimbo icmetequid acte bēdambo icquid nushan nibēdquidquio chēuēdsho ispombi.

² Nuquin Papa yacnuēshquio choec chēuēdec ambo tabadquido Esus tantiaquido tabadaid shubu nēnantanquio chēuēdposh. Aid cuēmambi matses unēstiapimbo icmetequid cuētetsen icposh. Baded-badedquieci bacuēquidquio niosh. Inchēshēn ushē choan-choanquieci badedquio bacuēquid niosh. Aid cuēte podo nidaid utsi-utsiec yacno tabadquido bēdambo icmetequid niosh. —Aton Mado abided cuidadec unēsaid tantiaquido abēdi tabadmequin Nuquin Papan unēstiapimbo icquid icmendac —camenuen aid acte ismeposhi. —Matses utsi-utsiec Esus tantiaquid icsho abēdi tabadmequin Nuquin Papan daicsabudtiapimbo icquid icmendac —camenuen cuēte aton podobēdta ismeposhi.

³ Aden abitedi bēdambo icmiac cuidtequido nibēdquio iquendac. Icsambo icquido nibēdnuc Nuquin Papa aton Mado Esusbēd tabadacnoshon aid daēdi tantiaquieci Esus tantiaquido tabadendac.

⁴ Adec: —Con bacuēbo nec —quequin Nuquin Papan abi cuēmēdquid dada uaquin bēsiaidon Nuquin Papambo bēisquieci tabadendac. —Nidaidēn tabadec bēdamboec tabadquido Nuquin

Papaböd tabadec abipadquio bödamboshë yanendac —camenuen aden ismeposhi.

⁵ Ambo bödambouidquio yec inchëshenquio iquendac. Nuquin Papa bëchamauanquieccquidëmbi ushëmbouidquio iquendac inchëshaid tantiadenquio yec. —Aden abi tantiaquido bödamboen isquin ënenquio icquin bödamboshë icmendac. Chuiquid dapabo icmiac Esusbëdtambi ënenquio icquin namendac —quequin ismeposhi.

⁶ Adshumbic mayan bëdan chuioaposhi. —Tantia. Mibi chuinu. Nuquin Papan Mayanën tantiamiac: “Yuecash adquid iquendac,” quequin min tsusedpabo isadaidbon abimbo chuiquin dada uapampic. Adembidi aton Mayanën nami-aid icquin abimbo chuiquin mibi dadpen ismebanombi. “Nëbi adquid iquendac. Utsi yuecash iquendac,” quequin mibi tantiamenuen ismebanombi —queposh Nuquin Papan abi yacnoshon uaid mayan bëda.

Esus chote chiaid

⁷ Adnubini Esusënquio naden chuiposh. —Chieshtoenquio icquin ëbi tantiata. Nëbimbobi nidaidën choec budebique. Nëid dada uaid isquin ëbi tantiaquiota. Adsho mibi bëdambo icmendambi —caposhi Esusën.

⁸ Uan nebi. Abimbo chuiquin nëid dada uaombi. Aden mayan bëdan chuibanquin ismeposhi. Aden ënquimbi ismiaquini: —Nuquin Papapadquidien nechitec —quetanec danëshën tinquebuduidpoc ëbi ismequid mayan bëda ismenuec.

⁹ Adshobini: —Padi. Aden ëbi ismenda. Mibipadquid Nuquin Papan yuabidi nebique.

Ëndenquimboshë Nuquin Papan tantiamiac min tsusedpabo isadaidbon ambi chiaidquio dada uapampic. Nëbi ëmbi ismeboed tantiaquin Nuquin Papan chiacpadomboen naquido aton yuabobidi nec. Adquidbidi nebi aton yuambo. Nuquin Papauidsëqui tantiaquin aden ismeta —caposhi mayan bëdan.

¹⁰ Adashic padpidec: —Ëmbi chuibamboedbëdta ëmbi ismeboedtedi chuiquin dada uata. “Nëid dada uaid isec onquequin ma Esus tantiaquidon tantianu. Nëbi adquid yanushe. Chieshtoenquio icquin Esus tantiec ma tabadnu,” queshun dada uata.

¹¹ Nëbimbobi Esus chonoc Esus tantiesabo bad-edquio bëdamboec tabadcuentiapimbo iquendac. Abi icsaid badedquio ëntiapimbo iquendac. Esus tantiaquido abi bëdamboec tabadacpadquiecbidi bëdamboec tabadpashun —queposh mayan bëda.

¹² Adnubini Esusën chuioaposh. — Chieshtoenquio icquin ëbi tantiaata. Nëbimbobini choendac. Choshon matsesën naidtedi tantiaquin icsaido cuidquimbi ëbi tantiaquido ëbëdi tabadmendambi.

¹³ Nuquin Papapadquidquio nebi. Ëmbi tantiacmaid nibëdnuc abitedi comapenen tantiaquidquio nebi. Nidaid uabi yec ictenedi nëbi adquidquio yec nibëdantiapimbo icquid nebi. Adquid yec abitedishun Icbombo nebi.

¹⁴ Icsambo icboedon ëbi tantiasho icsaisabimboecnuc Nuquin Papan bëdamboen isendac. Adshun ëbi yacnombo puduedmequin unëstiapimbo icquido icmendac unëstiapimbo icmiantequid cuëte bacuë chemiacbimboen.

15 Padnuen ëbi tantiesabo bëdamboen isacmaido Nuquin Papa yacno puduedtiapimbo iquendac. Nadquid icsambo icquid caimbi. Nëidic nënëchoquidobëdi cuëte podo chodcashun unës uante bunquido. Nëidic dada cuididimbo. Nëidic chido chishpida. Nëidic aton chidopenquio chudquido. Nëidic aton bënëpenquio chudmequido. Nëidic cuesanquido. Nëidic papa quequin ambi nacnenaide tantiaquido. Nëidic abi bunaiduidquio naic muauanquido. Aidtedi Nuquin Papa yacno puduedtiapimbo iquendac.

16 Ëmbi chiacpadomboen mayan bëdan mibi ismebamposh. “Ma ëbi tantiaquidon iste dada uanu,” quequin ëmbi chiacpadomboen mibi ismebamposh. Nuquin Papan dada uamiac mat-sesën: “Dabidën tsyuecquid yec abitedimbo chuiquid dapa iquendac,” quequin chuipampid nebi. Isadaidbon cainaidquio nebi. Utsin: “Dëniacnu,” cadiapiambo icquid nebi. Adquid icquin matses abitedimbo namendambi –quequin chuiposhi Esusën.

17 Adsho tantiashun Nuquin Papan Mayanën tantiamiacpadomboen chuiquin: –Nëbimbobi Esus chonoshe. Aidquio tantiabenta –caindac Esus tantiaquidon Esus tantiesabo chuiquin. Ëmbi chuiboed tantiaquidtedishun: –Nëbimbobi chonoshe. Aidquio tantianuna –cac bëdambo ictsiash. Adsho tantiash Esus tantiesabo acte bunacbimboec Esus tantiate bunsho Nuquin Papan bëdamboen isendac. Nuquin Papa bëdamboen ismenuen menete nibëdnuc Esusuidi tantiasho Nuquin Papan bëdamboen isquin abëdi tabadmendac.

18 Tantia. Ęmbi chuiboed tantiaquido chuinu. Nuquin Papan: –Nadquid iquendac. Yuecash utsi iquendac –quequin ěbi ismeboedtedi dada uaombi. Ęmbi dada uaboed tsitěnquin ambembi chiaid dada uainda. Ęmbi chuibocpadomboen Nuquin Papan mibi cuidtsiashe.

19 Adembidi ěmbi dada uaboed utsi uainquio icquin abimbo chuita. Ęmbi chuibocpadomboen Nuquin Papan mibi uněstiapimbo icquid icmenquio ictsiashe. Adembidi bědamboshě yacno abědi mibi tabadmenquio ictsiashe.

20 –Ma aidtedi tantianu –quequin Esusën chiacpadomboen mayan bědan aidtedi ismeposhi. Ęmbi chuibocpadomboen Esusën: –Něbimbobini choendac –caposhi. Adsho tantiashun: –Ai, něbimbobi chota –capombi.

21 Mibitedi Esus tantiaquidotedi tantiaquin: –Ambi nabocpadomboen Nuquin Icho Esusën bědamboen isquin bědambo icmepashun –caimbi. Padi. Aidtedi chuiquin dada uaombi.

Esuquidistu Chuiquin Tantiamete New Testament in Matsés (PE:mcf:Matsés)

copyright © 2008 Wycliffe Bible Translators, Inc.

Language: Matsés

Translation by: Wycliffe Bible Translators, Inc.

Matsés [mcf], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Matsés

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

446da786-5bd1-5ffa-85e2-9eff4052cf8b